

大般涅槃經

(三十六卷：第十卷至第十二卷)

北涼天竺三藏曇無讖譯 梵

宋沙門慧嚴慧觀同謝靈運再治



南無本師釋迦牟尼佛

說 明

本繁體校正版《大般涅槃經》(南本)電子書，是根據《乾隆大藏經》大乘涅槃部，第0110部，北涼天竺三藏曇無讖譯梵、宋沙門慧嚴慧觀同謝靈運再治《大般涅槃經》(36卷)影印本校正的。標點符號僅供參考。

為了便於讀誦，本電子書按順序每三卷合為一冊，共十二冊。若每天讀一冊，可十二天讀完。

本電子書是免費結緣品。特此說明。

仁慧草堂

二〇一八年九月

目 录

起誦儀	- 1 -
香讚	- 1 -
開經偈	- 1 -
大般涅槃經卷第十	- 2 -
一切大眾所問品第十七	- 2 -
現病品第十八	- 22 -
大般涅槃經卷第十一	- 38 -
聖行品第十九之一	- 38 -
大般涅槃經卷第十二	- 75 -
聖行品第十九之二	- 75 -
結誦儀	- 100 -
補闕真言	- 100 -
發願文	- 100 -
迴向偈	- 101 -
迴向偈	- 101 -
三皈依	- 102 -

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

大般涅槃經卷第十

北涼天竺三藏曇無讖譯 梵

宋沙門慧嚴慧觀同謝靈運再治

一切大眾所問品第十七

爾時，世尊從其面門，放種種色，青、黃、赤、白、紅、紫光明照純陀身。純陀遇已，與諸眷屬，持諸肴饌¹，疾往佛所，欲奉如來及比丘僧最後供養，種種器物，充滿具足，持至佛前²。

爾時，有大威德天人而遮其前，周帀圍繞，謂純陀言：「且止！純陀，勿便奉施。」

爾時，如來復放無量無邊種種光明，諸天大眾遇斯光已，尋聽純陀前至佛所奉其所施。

爾時，天人及諸眾生，各各自持所齋³供養，至於佛前，長跪白佛：「惟願如來，聽諸比丘受此供養。」

時諸比丘知是時故，執持衣鉢，一心安詳。

爾時，純陀為佛及僧布置種種師子寶座，懸繒旛蓋、香華⁴、瓔珞。

¹ 大正藏：持諸銷餽

² 大正藏：所

³ 大正藏：各各自取所持

⁴ 大正藏：華香

爾時，三千大千世界莊嚴微妙，猶如西方安樂國土。

爾時，純陀住於佛前，憂悲悵怏，重白佛言：「惟願如來，猶見哀憫，住壽一劫若減一劫。」

佛告純陀：「汝欲令我久住世者，宜當速奉最後具足檀波羅蜜。」

爾時，一切菩薩摩訶薩、天、人、雜類，異口同音，唱如是言：「奇哉！純陀，成大福德，能令如來受其最後無上供養。我等無福，所設供具，則為唐捐。」

爾時，世尊欲令一切眾望滿足，於自身上一一毛孔化無量佛，一一諸佛各有無量諸比丘僧。是諸世尊及無量眾，悉皆示現，受其供養。釋迦如來自受純陀所奉設者。

爾時，純陀所持粳糧成熟之食，摩伽陀國滿足八斛，以佛神力，皆悉充足一切大會。

爾時，純陀見是事已，心生歡喜，踊躍無量，一切大眾亦復如是。

爾時，大眾承佛聖旨，各作是念：「如來今已受我等施，不久必⁵當入於涅槃。」作是念已，心生悲喜。

⁵ 大正藏：便

爾時，樹林其地狹小，以佛神力，如針鋒處皆有無量諸佛世尊及其眷屬等坐而食，所食之物亦無差別。是時，天、人、阿脩羅等啼泣悲歎，而作是言：「如來今日已受我等最後供養，受供養已，當般涅槃，我等當復更供養誰？我今永離無上調御，盲無眼目。」

爾時，世尊為欲安慰一切大眾，而說偈言：

汝等莫悲歎 諸佛法應爾
我入於涅槃 已經無量劫
常受最勝樂 永處安隱處
汝今至心聽 我當說涅槃
我已離食想 終無飢渴患
今當為汝等 說其隨順願
令諸一切眾 咸得安隱樂
汝聞應修行 諸佛法常住
假使烏與梟 同共一樹棲
猶如親兄弟 爾乃永涅槃
如來視一切 猶如羅睺羅
常為眾生尊 云何永涅槃
假使蛇鼠狼 同處於一穴⁶
相愛如兄弟 爾乃永涅槃

⁶ 大正藏：同處一穴遊

如來視一切 猶如羅睺羅
常為眾生尊 云何永涅槃
假使七葉華 轉為婆師香
迦留為鎮頭 爾乃永涅槃
如來視一切 猶如羅睺羅
云何捨慈悲 永入於涅槃
假使一闍提 現身成佛道
永處第一樂 爾乃入涅槃
如來視一切 皆如羅睺羅
云何捨慈悲 永入於涅槃
假使一切眾 一時成佛道
遠離諸過患 爾乃入涅槃
如來視一切 皆如羅睺羅
云何捨慈悲 永入於涅槃
假使蟲蝨⁷水 浸壞於大地
川谷海盈滿 爾乃入涅槃
悲心視一切 皆如羅睺羅
常為眾生尊 云何永涅槃
以是故汝等 應深樂正法
不應生憂惱 號泣而啼哭
若欲自正行 應修如來常

⁷ 大正藏：蚊蚋

當觀如是法 長存不變易
復應生是念 三寶皆常住
是則獲大護 如呪枯生果
是名為三寶 四眾應善聽
聞已應歡喜 即發菩提心
若能計三寶 常住同真諦
此則是諸佛 最上之誓願

「若有比丘、比丘尼、優婆塞、優婆夷能以如來最上誓願而發願者，當知是人，無有愚癡，堪受供養。以此願力功德果報，於世最勝，如阿羅漢。若有不能如是觀了三寶常者，是旃陀羅。若有能知三寶⁸常住實法因緣，離苦安樂，無有嫉害能留難者。」

爾時，人天大眾、阿脩羅等，聞是法已，心生歡喜，踊躍無量。其心調柔，善滅諸蓋，心無高下，威儀⁹清淨，顏貌怡悅，知佛常住。是故施設諸天供養，散種種華、末香、塗香，鼓天妓¹⁰樂，以供養佛。

爾時，佛告迦葉菩薩言：「善男子，汝見是眾希有事不？」

⁸ 大正藏：寶；永樂北藏及龍藏：法

⁹ 大正藏：儀；永樂北藏及龍藏：德

¹⁰ 大正藏：伎

迦葉答言：「已見，世尊！見諸如來無量無邊不可稱計，受諸大眾人天所奉飯食供養。又見諸佛大身莊嚴，所坐之處如一針鋒，多眾圍繞，不相障閼¹¹。復見大眾悉發誓願說十三偈。亦知大眾各心念言：『如來今者，獨受我供。』假使純陀所奉飯食，碎如微塵，一塵一佛猶不周遍，以佛神力，悉皆充足一切大眾。唯諸菩薩摩訶薩、文殊師利法王子等能知如來¹²希有事耳，悉是如來方便示現。聲聞大眾及阿脩羅等，皆知如來是常住法。」

爾時，世尊告純陀言：「汝今所見為是希有奇特事不？」

「實爾，世尊！我先所見無量諸佛，三十二相、八十種好莊嚴其身。今悉見為菩薩摩訶薩，巨身殊異，顏貌無比。唯見佛身譬如藥樹，為諸菩薩摩訶薩等之所圍繞。」

佛告純陀：「汝先所見無量佛者是我所化，為欲利益一切眾生，令得歡喜。如是菩薩摩訶薩等所可修行不可思議，能作無量諸佛之事。純陀，汝今皆已成就菩薩摩訶薩行，得十住地¹³，菩薩

¹¹ 大正藏：礙

¹² 大正藏：是

¹³ 大正藏：得住十地

所行具足成辦。」

迦葉菩薩白佛言：「世尊！如是如是，如佛所說，純陀所修，成菩薩行，我亦隨喜。今者如來，欲為未來無量眾生作大明故，說是大乘《大涅槃經》。世尊！一切契經說有餘義？無餘義耶？」

「善男子，我所說者，亦有餘義，亦無餘義。」

純陀白佛言：「世尊！如佛所說：『所有之物，布施一切，唯可讚歎，無可毀損。』世尊！是義云何？持戒、毀戒，有何差別？」

佛言：「唯除一人，餘一切施皆可讚歎。」

純陀問言：「云何名為唯除一人？」

佛言：「如此經中所說破戒。」

純陀復言：「我今未解，惟願說之。」

佛告純陀言：「破戒者，謂一闍提。其餘在所一切布施，皆可讚歎，獲大果報。」

純陀復問：「一闍提者，其義云何？」

佛告純陀：「若有比丘及比丘尼、優婆塞、優婆夷，發麤惡言誹謗正法，造是重業，永不改悔，心無慚愧，如是等人，名為趣向一闍提道。若犯四重、作五逆罪，自知定犯如是重事，而心初無怖畏慚愧，不肯發露，於佛正法永無護惜建

立之心，毀訾¹⁴輕賤，言多過咎，如是等人，亦名趣向一闡提道。若復說言：『無佛、法、僧¹⁵。』如是等人，亦名趣向一闡提道。唯除如此一闡提輩，施其餘者一切讚歎。」

爾時，純陀復白佛言：「世尊！所言破戒，其義云何？」

佛告純陀：「若犯四重及五逆罪，誹謗正法，如是等人名為破戒。」

純陀復問：「如是破戒可拔濟不？」

佛告純陀：「有因緣故，則可拔濟。若被法服，猶未捨遠，其心常懷慚愧、恐怖，而自考責：『咄哉！何為犯斯重罪？何其怪哉！造斯苦業。』深自改悔，生護法心，欲建正法：『有護法者，我當供養。若有讀誦大乘典者，我當咨問、受持、讀誦。既通利已，復當為他分別廣說。』我說是人，不名¹⁶破戒。何以故？善男子，譬如日出，能除一切塵翳、闇冥；是大涅槃微妙經典出興於世，亦復如是，能除眾生無量劫中，所作眾罪。是故，此經說護正法得大果報，拔濟破戒。若有毀謗是正法者，能自改悔，還歸於法，自念所作

¹⁴ 大正藏：訾

¹⁵ 大正藏：僧；永樂北藏及龍藏：眾

¹⁶ 大正藏：為

一切不善，如人自害，心生恐怖、驚懼、慚愧：『除此正法，更無救護，是故應當還歸正法。』若能如是如說歸依，布施是人得福無量，亦名世間應受供養。若犯如上惡業之罪，若經一月，或十五日，不生歸依發露之心。若施是人，果報甚少。犯五逆者亦復如是，能生悔心，內懷慚愧：『今我所作不善之業，甚為大苦，我當建立、護持正法。』是則不名五逆罪也。若施是人，得福無量。犯逆罪已，不生護法、歸依之心。有施是者，福不足言。

「又，善男子，犯重罪者，汝今諦聽，我當為汝分別廣說，應生是心：『謂正法者，即是如來微密之藏。是故，我當護持、建立。』施是人者，得勝果報。

「善男子，譬如女人，懷妊垂產，值國荒亂，遠至他土，在一天廟，即便產育。後聞舊邦安隱豐熟，携持其子，欲還本土，路經恒河，水長¹⁷暴急，荷負是兒，不能得度¹⁸。即自念言：『我寧與子一處并¹⁹命，終不捨棄而獨濟也。』作是念已，與子俱沒。命終之後，尋生天中，以慈念故²⁰，

¹⁷ 大正藏：漲

¹⁸ 大正藏：渡

¹⁹ 大正藏：併

²⁰ 大正藏：子

欲令得度。而是女人本性弊惡，以愛子故得生天中。犯四重禁、五無間罪生護法心，亦復如是，雖復先為不善之業，以護法故，得為世間無上福田。是護法者，有如是等無量果報。」

純陀復言：「世尊！若一闍提能自改悔，恭敬、供養、讚歎三寶，施如是人，得大果報不²¹？」

佛言：「善男子，汝今不應作如是說。善男子，譬如有人，食菴羅果，吐核置地，而復念言：『是果核中，應有甘味。』即便²²還取，破而嘗之，其味極苦，心生悔恨，恐失果種，即還收拾，種之於地，勤加修治，以蘇油乳隨時溉灌。於意云何？寧可生不？」

「不也。世尊！假使天降無上甘雨，猶亦不生。」

「善男子，彼一闍提亦復如是，燒滅善根，當於何所而得除罪？善男子，若生善心，是則不名一闍提也。善男子，以是義故，一切所施所得果報非無差別。何以故？施諸聲聞所得報異，施辟支佛得報亦異，唯施如來獲無上果。是故說言一切所施非無差別。」

²¹ 大正藏：得大果不

²² 大正藏：復

純陀復言：「何故如來而說此偈？」

佛告純陀：「有因緣故，我說此偈。王舍城中有優婆塞，心無淨信，奉事尼捷²³，而來問我布施之義，以是因緣，故說斯偈，亦為菩薩摩訶薩等說祕藏義。如斯偈者，其義云何？一切者，少分一切。當知菩薩摩訶薩，人中之雄，攝取持戒，施其所須，捨棄破戒，如除稊稗。

「復次，善男子，如我昔日所說偈言：

一切江河 必有迴曲

一切叢林 必名樹木

一切女人 必懷諂曲

一切自在 必受安樂

爾時，文殊師利菩薩摩訶薩，即從座起，偏袒右臂，右膝著地，前禮佛足，而說偈言：

非一切河 必有迴曲

非一切林 悉名樹木

非一切女 必懷諂曲

一切自在 不必受樂

「佛所說偈，其義有餘，唯垂哀憫，說其因緣。何以故？世尊！於此三千大千世界有洲名拘耶尼，其洲有河，端直不曲，名娑婆耶，猶如直

²³ 大正藏：捷

繩入於西海。如是河相，於餘經中，佛未曾說，惟願如來，因此方等阿含經中說有餘義，令諸菩薩深信解之。世尊！譬如有人，先識金鑛，後不識金。如來亦爾，盡知法已，而所演說有餘不盡。如來雖作如是餘說，應當方便解其意趣。一切叢林必是樹木，是亦有餘。何以故？種種金、銀、瑠璃寶樹，是亦名林。一切女人必懷諂曲，是亦有餘。何以故？亦有女人善持禁戒，功德成就，有大慈悲。一切自在必受安樂，是亦有餘。何以故？有自在者，轉輪聖帝，如來法王，不屬死魔，不可滅盡。梵釋諸天雖得自在，悉是無常。若得常住無變易者，乃名自在，所謂大乘大般涅槃。」

佛言：「善男子，汝今善得樂說之辯，且止！諦聽！文殊師利，譬如長者，身嬰病苦，良醫診之，為合膏藥。是時，病者貪欲多服，醫語之言：『若能消者，則可隨意，汝今體羸，不應多服。當知是膏，亦名甘露，亦名毒藥，若多服不消，則名為毒。』善男子，汝今勿謂是醫所說違於義理，損失膏勢。善男子，如來亦爾，為諸國王、后妃、太子、王子、大臣，因波斯匿王、王子、后妃憍慢心故，為欲調伏，示現恐怖，如彼良醫，故說此偈：

一切江河 必有迴曲

一切叢林 必名樹木

一切女人 必懷諂曲

一切自在 必受安樂

「文殊師利，汝今當知，如來所說無有漏失，如此大地可令反覆，如來之言終無漏失。以是義故，如來所說一切有餘。」

爾時，佛讚文殊師利：「善哉！善哉！善男子，汝已久知如是之義，哀憫一切、欲令眾生得智慧故，廣問如來如是偈義。」

爾時，文殊師利法王子，復於佛前，而說偈言：

於他語言 隨順不逆

亦不觀他 作以不作

但自觀身 善不善行

「世尊如是說此法藥非為正說，於他語言隨順不逆者，惟願如來垂哀正說。何以故？世尊常說，一切外學九十五種皆趣惡道，聲聞弟子皆向正路，若護禁戒，攝持威儀，守慎諸根，如是等人深樂大法，趣向善道。如來何故於九部中，見有毀他，則便呵責？如是偈義，為何所趣？」

佛告文殊師利：「善男子，我說此偈，亦不

盡為一切眾生。爾時，唯為阿闍世王。諸佛世尊若無因緣終不逆說，有因緣故乃說之耳。善男子，阿闍世王害其父已，來至我所，欲折伏我，作如是問：『云何世尊是一切智、非一切智耶？若一切智，調達往昔無量世中，常懷惡心，隨逐如來欲為逆害，云何如來聽其出家？』善男子，以是因緣，我為是王而說此偈：

於他語言 隨順不逆
亦不觀他 作以不作
但自觀身 善不善行

「佛告大王：『汝今害父，已作逆罪，最重無間，應當發露，以求清淨，何緣乃更見他過咎？』善男子，以是義故，我為彼王而說是偈。」

「復次，善男子，亦為護持不毀禁戒成就威儀見他過者而說是偈。若復有人，受他教誨，遠離眾惡，復教他人，令遠眾惡，如是之人，則我弟子。」

爾時，世尊為文殊師利復說偈言：

一切畏刀杖 無不愛壽命
恕己可為譬 勿殺勿行杖

爾時，文殊師利復於佛前而說偈言：

非一切畏杖 非一切愛命

恕己可為譬 勤作善方便

「如來說是法句之義亦是未盡。何以故？如阿羅漢、轉輪聖王、玉女、象馬、主藏大臣，若諸天、人及阿脩羅，執持利劍能害之者，無有是處。勇士、烈女、馬王、獸王，持戒比丘雖復對至而不恐怖。以是義故，如來說偈亦是有餘。若言恕己可為譬者，是亦有餘。何以故？若使羅漢以己譬²⁴彼，則有我想及以命想。若有我想及以命想，則應擁護。凡夫亦應見阿羅漢悉是行人。若如是者，即是邪見。若有邪見，命終應生阿鼻地獄。又，阿羅漢設於眾生生害心者，無有是處；無量眾生亦復無能害羅漢者。」

佛言：「善男子，言我想者，謂於眾生生大悲心，無殺害想，謂阿羅漢平等之心。勿謂世尊無有因緣而逆說也。昔日於此王舍城中有大獵師，多殺群鹿，請我食肉。我於是²⁵時，雖受彼請，於諸眾生生慈悲心如羅睺羅，而說偈言：

當令汝長壽 久久住於世
受持不害法 猶如諸佛壽

「是故，我說此偈：

²⁴ 大正藏：喻

²⁵ 大正藏：爾

一切畏刀杖 無不愛壽命

恕己可為譬 勿殺勿行杖

佛言：「善哉！善哉！文殊師利，為諸菩薩摩訶薩故，咨問如來如是密教。」

爾時，文殊師利復說是偈：

云何敬父母 隨順而尊重

云何修此法 墮於無間獄

於是，如來復以偈答：

若以貪愛母 無明以為父

隨順尊重是 則墮無間獄

爾時，如來復為文殊師利重說偈言：

一切屬他 則名為苦

一切由己 自在安樂

一切憍慢 勢極暴惡

賢善之人 一切愛念

爾時，文殊師利菩薩摩訶薩白佛言：「世尊！如來所說是亦不盡，惟願如來復垂哀憫，說其因緣。何以故？如長者子，從師學時，為屬師不？若屬師者，義不成就；若不屬者，亦不成就；若得自在，亦不成就。是故，如來所說有餘。復次，世尊！譬如王子，無所綜習，觸事不成，是亦自在、愚闇、常苦。如是王子若言自在，義亦不成；

若言屬他，義亦不成。以是義故，佛所說義，名為有餘。是故，一切屬他，不必受苦；一切自在，不必受樂。一切憍慢，勢極暴惡，是亦有餘。世尊！如諸烈²⁶女，憍慢心故，出家學道，護持禁戒，威儀成就，守攝諸根，不令馳散。是故，一切憍慢之結不必暴惡。賢善之人，一切愛念，是亦有餘。如人內犯四重禁已，不捨法服，堅持威儀，護持法者見已不愛，是人命終必墮地獄。若有善人犯重禁已，護持法者見即驅出，罷道還俗。以是義故，一切賢善不必悉愛。」

爾時，佛告文殊師利：「有因緣故，如來於此說有餘義。又有因緣，諸佛如來而說是法。時，王舍城有一女人，名曰善賢，還父母家，因至我所，歸依於我及法、眾僧，而作是言：『一切女人，勢不自由；一切男子，自在無閼²⁷。』我於是²⁸時，知是女心，即為宣說如是偈頌。文殊師利，善哉！善哉！汝今能為一切眾生，問於如來如是密語。」

文殊師利復說偈言：

一切諸眾生 皆依飲食存

²⁶ 大正藏：列

²⁷ 大正藏：礙

²⁸ 大正藏：爾

一切有大力 其心無嫉妬
一切因飲食 而得諸病苦
一切修淨行 而得受安樂

「如是，世尊！今受純陀飲食供養，將無如來有恐怖耶？」

爾時，世尊復為文殊而說偈言：

非一切眾生 盡依飲食存
非一切大力 心皆無嫉妬
非一切因食 而致諸病苦
非一切淨行 悉得受安樂

「文殊師利，汝若得病，我亦如是應得病苦。何以故？諸阿羅漢及辟支佛、菩薩、如來，實無所食，為欲化彼，示現受用無量眾生所施之物，令其具足檀波羅蜜，拔濟地獄、畜生、餓鬼。若言如來六年苦行，身羸瘠²⁹者，無有是處。諸佛世尊獨拔諸有，不同凡夫，云何而得身羸劣耶？諸佛世尊，精勤修習，獲金剛身，不同世人危脆之體³⁰。我諸弟子亦復如是，不可思議，不依於食。一切大力無嫉妬者，亦有餘義。如世間人，終身永無嫉妬之心而無大力。一切病苦因食得者，

²⁹ 大正藏：瘦

³⁰ 大正藏：身

亦有餘義。亦見有人得客病者，所謂棘³¹刺、刀劍、矛稍³²。一切淨行受安樂者，是亦有餘。世間亦有外道之人，修於梵行，多受苦惱。以是義故，如來所說一切有餘，是名如來非無因緣而說此偈，有因故說。昔日於此優禪尼國，有婆羅門名殺毘德，來至我所，欲受第四八戒齋法，我於爾時為說此³³偈。」

爾時，迦葉菩薩白佛言：「世尊！何等名為無餘義耶？云何復名一切義乎？」

「善男子，一切者，唯除助道常樂善法，亦³⁴名一切，亦名無餘。其餘諸法，亦名有餘，亦名無餘，欲令樂法諸善男子知此有餘及無餘義。」

迦葉菩薩心大歡喜，踊躍無量，前白佛言：「甚奇！世尊！等視眾生如羅睺羅。」

爾時，佛讚迦葉菩薩：「善哉！善哉！汝今所見微妙甚深。」

迦葉菩薩白佛言：「世尊！惟願如來說是大乘大涅槃經所得功德。」

佛告迦葉：「善男子，若有得聞是經名字，所得功德，非諸聲聞、辟支佛等所能宣說，唯佛

³¹ 大正藏：刺

³² 大正藏：鉞槩

³³ 大正藏：是

³⁴ 大正藏：是

能知。何以故？不可思議，是佛境界。何況受持、讀誦、通利、書寫經卷？」

爾時，諸天、世人及阿脩羅即於佛前，異口同音而說偈言：

諸佛難思議	法僧亦復然
是故今勸請	惟願小停住
尊者大迦葉	及以阿難等
二眾之眷屬	不久須臾至
并及摩竭主	阿闍世大王
至心敬信佛	猶故未來此
惟願佛世尊	少垂哀憫住
於此大眾中	斷我諸疑網

爾時，如來為諸大眾而說偈言：

我法最長子	是名大迦葉
阿難勤精進	能斷一切疑
汝等當諦觀	阿難多聞士
自然當 ³⁵ 解了	是常及無常
以是故不應	心懷大憂惱

爾時，大眾以種種物供養如來，供養佛已，即發阿耨多羅三藐三菩提心，無量無邊恒河沙數諸菩薩等，得住初地。

³⁵ 大正藏：能

爾時，世尊與文殊師利、迦葉菩薩及與純陀而受記荊，受記荊已，說如是言：「諸善男子，自修其心，慎莫放逸。我今背疾，舉體皆痛。我今欲卧，如彼小兒及常患者。文殊，汝等當為四部廣說大法，今以此法付囑於汝，乃至迦葉、阿難等至，復當付囑³⁶如是正法。」

爾時，如來說是語已，為欲調伏諸眾生故，現身有疾，右脅而卧，如彼病人。

現病品第十八³⁷

爾時，迦葉白佛言³⁸：「世尊！如來已免一切諸³⁹病，患苦悉除，無復怖畏。世尊！一切眾生有四毒箭則為病因。何等為四？貪欲、瞋恚、愚癡、憍慢。若有病因，則有病生，所謂寒⁴⁰熱肺病、上氣吐逆、膚體瘡癩、其心悶亂、下痢噦咽⁴¹、小便淋瀝、眼耳疼痛、腹背脹滿、顛狂乾消、鬼魅所著。如是種種身心諸病，諸佛世尊悉無復有。今日如來何緣顧命文殊師利，而作是言：『我今背痛，汝等當為大眾說法。』有二因緣，則無

³⁶ 大正藏：復當囑付

³⁷ 大正藏：大般涅槃經現病品第十八

³⁸ 大正藏：迦葉菩薩白佛言

³⁹ 大正藏：疾

⁴⁰ 大正藏：愛

⁴¹ 大正藏：噎

病苦。何等為二？一者，憐憫一切眾生；二者，給施病者醫藥。如來往昔，已於無量萬億劫中，修菩薩道，常行愛語，利益眾生，不令苦惱，施諸⁴²病者種種醫藥，何緣於今自言有病？

「世尊！世人有病，或坐或卧不安其處，或索飲食，勅誡家屬修治產業。何故如來默然而卧，不教弟子聲聞人等尸波羅蜜、諸禪解脫、三摩跋提、修諸正勤？何緣不說如是甚深大乘經典？何故不以無量方便教大迦葉、人中象王、諸大人等，令其不退阿耨多羅三藐三菩提？何故不治諸惡比丘，受畜一切不淨物者？

「世尊實無有病，云何默然右脅而卧？諸菩薩等，凡所給施病者醫藥，所得善根悉施眾生，而共迴向一切種智，為除眾生諸煩惱障、業障、報障。煩惱障者，貪欲、瞋恚、愚癡、忿怒纏蓋，焦惱、嫉妬、慳悋、姦詐、諛諂、無慚、無愧，慢、慢慢、不如慢、增上慢、我慢、邪慢、憍慢，放逸貢高，懟恨諍訟，邪命諂媚，詐現異相，以利求利，惡求多求，無有恭敬，不隨教誨，親近惡友，貪利無厭，纏縛難解，欲於惡欲，貪於惡貪，身見、有見及以無見，頻申喜睡，欠喏不樂，

⁴² 大正藏：疾；永樂北藏及龍藏：諸

貪嗜飲食，其心蕞薈，心緣異相⁴³，不善思惟，身口多惡，好喜多語，諸根闇鈍，發言多虛，常為欲覺、恚覺、害覺之所覆蓋，是名煩惱障。業障者，五無間罪重惡之病。報障者，生在地獄、畜生、餓鬼，誹謗正法及一闡提，是名報障。如是三障名為大病。而諸菩薩於無量劫修菩提時，給施一切疾病醫藥，常作是願：『令諸眾生，永斷如是三障重病。』

「復次，世尊！菩薩摩訶薩修菩提時，給施一切病者醫藥，常作是願：『願令眾生，永斷諸病，得成如來金剛之身。又願一切無量眾生作妙藥王，斷除一切諸惡重病。願諸眾生得阿伽陀藥，以是藥力，能除一切無量惡毒。又願眾生於阿耨多羅三藐三菩提無有退轉，疾⁴⁴得成就無上佛藥，消除一切煩惱毒箭。又願眾生勤修精進，成就如來金剛之心，作微妙藥療治眾病，不令有人生諍訟想。亦願眾生作大藥樹，療治一切諸惡重病。又願眾生拔出毒箭，得成如來無上光明。又願眾生得入如來智慧大藥、微密法藏。』世尊！菩薩如是已於無量百千萬億那由他劫，發是誓願，令

⁴³ 大正藏：想

⁴⁴ 大正藏：速

諸眾生，悉無諸病。何緣如來乃於今日唱言有疾⁴⁵。

「復次，世尊！世有病者，不能坐起、俯仰、進止，食飲⁴⁶不御，漿水不下，亦復不能教誡諸子修治家業。爾時，父母、妻子、兄弟、親屬、知識，皆於是人生必死想。世尊！如來今日亦復如是，右脅而卧，無所論說。此閻浮提一切⁴⁷愚人當作是念：『如來正覺，必當涅槃。』生滅盡想。而如來性實不畢竟入於涅槃。何以故？如來常住，無變易故。以是因緣，不應說言：『我今背痛。』」

「復次，世尊！世有病者，身體羸損，若偃若側，卧著床褥。爾時，眾人心生惡賤，起必死想。如來今者，亦復如是，當為外道九十五種之所輕慢、生無常想。彼諸外道，當作是言：『不如我等，以我性人、自在時節、微塵等法而為常住，無有變易。沙門瞿曇無常所遷，是變易法。』以是義故，世尊！今日不應默然右脅而卧。」

「復次，世尊！世有病者，四大增損，互不調適，羸瘦乏極。是故，不能隨意坐起，卧著床褥。如來四大，無不和適，身力具足，亦無羸損。」

⁴⁵ 大正藏：病

⁴⁶ 大正藏：飲食

⁴⁷ 大正藏：此閻浮提有諸

世尊！如十小牛力不如一大牛力，十大牛力不如一青牛力，十青牛力不如一凡象力，十凡象力不如一野象力，十野象力不如一二牙象力，十二牙象力不如一四牙象力，十四牙象力不如雪山一白象力，十雪山白象力不如一香象力，十香象力不如一青象力，十青象力不如一黃象力，十黃象力不如一赤象力，十赤象力不如一白象力，十白象力不如一山象力，十山象力不如一優鉢羅象力，十優鉢羅象力不如一拘物頭象力，十拘物頭象力不如一分陀利象力，十分陀利象力不如人中一力士力，十人中力士力不如一鉢建⁴⁸提力，十鉢建提力不如一八臂那羅延力，十那羅延力不如十住菩薩一節之力。凡夫身中，節不相到；人中力士，節頭相到；鉢建提身，諸節相接；那羅延身，節頭相鈎⁴⁹；十住菩薩，諸節骨解蟠龍相結。是故，菩薩其力最大。世界成時，從金剛際起金剛座，上至道場菩提樹下，菩薩坐已，其心即時，逮得十力。如來今者，不應如彼嬰孩小兒。嬰孩小兒愚癡無智，無所能說，以是義故，隨意偃側，無人譏訶。如來世尊，有大智慧照明一切，人之大

⁴⁸ 大正藏：健

⁴⁹ 大正藏：拘

龍，具大威德，成就神通，無上仙人，永斷疑網，已拔毒箭，進止安詳，威儀具足，得無所畏。今者何故右脅而卧，令諸人天悲愁苦惱？」

爾時，迦葉即於佛前，而說偈言：

瞿曇大聖德	願起演妙法
不應如小兒	病者卧床蓐
調御天人師	倚卧雙樹間
下愚凡夫見	當言必涅槃
不知方等典	甚深佛所行
不見微密藏	猶盲不見道
唯有諸菩薩	文殊師利等
能解是甚深	譬如善射人
三世諸世尊	大悲為根本
如是大慈悲	今為何所在
若無大悲者	是則不名佛
佛若必涅槃	是則不名常
惟願無上尊	哀受我等請
利益於眾生	摧伏諸外道

爾時，世尊大悲熏心，知諸眾生各各所念，將欲隨順，畢竟利益，即從卧起，結加⁵⁰趺坐，顏貌熙怡如融金聚，面目端嚴猶月盛滿，形容清

⁵⁰ 大正藏：跏

淨無諸垢穢，放大光明充遍虛空。其光大盛過百千日，照于東方、南西北方、四維、上下諸佛世界，惠施眾生大智之炬，悉令得滅無明黑闇，令百千億那由他眾生安止不退菩提之心。

爾時，世尊心無疑慮，如師子王，以三十二大人之相、八十種好莊嚴其身。於其身上一切毛孔，一一毛孔出一蓮華。其華微妙，各具千葉，純真金色，瑠璃為莖、金剛為須⁵¹、玫瑰為臺，形大團圓猶如車輪。是諸蓮華各出種種雜色光明，青、黃、赤、白、紫、玻瓈色。是諸光明皆悉遍至阿鼻地獄、想地獄、黑繩地獄、眾合地獄、叫喚地獄、大叫喚地獄、焦熱地獄、大焦熱地獄。是八地獄其中眾生，常為諸苦之所逼切，所謂燒煮、火炙、斫刺、剝剝，遇斯光已，如是眾苦悉滅無餘，安隱清涼，快樂無極。是光明中，宣說如來祕密之藏，言：「諸眾生皆有佛性。」眾生聞已，即便命終，生人天中。乃至八種寒冰地獄，所謂阿波波地獄、阿吒吒地獄、阿羅羅地獄、阿娑娑⁵²地獄、優鉢羅地獄、波頭摩地獄、拘物頭地獄、分陀利地獄。是中眾生，常為寒苦之所逼

⁵¹ 大正藏：鬚

⁵² 大正藏：阿娑娑

惱，所謂劈⁵³裂、身體碎壞、互相殘害，遇斯光已，如是等苦，亦滅無餘，即得調和，溫暖適身。是光明中，亦說如來祕密之藏，言：「諸眾生皆有佛性。」眾生聞已，即便命終，生人天中。爾時，於此閻浮提界及餘世界所有地獄，皆悉空虛，無受罪者，除一闍提。

餓鬼眾生，飢渴所逼，以髮纏身，於百千歲未曾得聞漿水之名，遇斯光已，飢渴即除。是光明中，亦說如來微密祕藏，言：「諸眾生皆有佛性。」眾生聞已，即便命終，生天人中⁵⁴，令諸餓鬼，亦悉空虛，除謗大乘方等正典。

畜生眾生，互相殺害，共相殘食，遇斯光已，恚心悉滅。是光明中，亦說如來祕密之藏，言：「諸眾生皆有佛性。」眾生聞已，即便命終，生人天中。當爾之時，畜生亦盡，除謗正法。

是一一華各有一佛，圓光一尋，金色晃曜，微妙端嚴，最上無比，三十二相、八十種好莊嚴其身。是諸世尊，或有坐者，或有行者，或有卧者，或有住者；或震雷音，或澍洪雨，或放電光，或扇大風，或出煙焰身如聚火⁵⁵，或有⁵⁶示現七寶

⁵³ 大正藏：擘

⁵⁴ 大正藏：生人天中

⁵⁵ 大正藏：或出煙焰身如火聚

⁵⁶ 大正藏：復

諸山、池泉、河水、山林、樹木，或復示現七寶國土、城邑、聚落、宮殿、屋宅，或復示現象、馬、師子、虎、狼、孔雀、鳳凰、諸鳥，或復示現令閻浮提所有眾生，悉見地獄、畜生、餓鬼，或復示現欲界六天；復有世尊或說陰、界、諸入多諸過患，或復有說四聖諦法，或復有說諸法因緣，或復有說諸業煩惱皆因緣生，或復有說我與無我，或復有說苦、樂二法，或復有說常、無常等，或復有說淨與不淨；復有世尊為諸菩薩演說所行六波羅蜜，或復有說諸大菩薩所得功德，或復有說諸佛世尊所得功德，或復有說聲聞之人所得功德，或復有說隨順一乘，或復有說三乘成道；或有世尊左脅出水、右脅出火，或有示現初生、出家、坐於道場、菩提樹下轉妙法輪、入于涅槃，或有世尊作師子吼，令此會中有得一果、二果、三果、至第四果，或復有說出離生死無量因緣。

爾時，於此閻浮提中所有眾生，遇斯光已，盲者見色，聾者聽聲，啞者能言，拘躄能行，貧者得財，慳者能施，恚者慈心，不信者信。如是世界無一眾生修行惡法，除一闍提。

爾時，一切天、龍、鬼神、乾闥婆、阿脩羅、

迦樓羅、緊那羅、摩睺羅伽、羅刹、建⁵⁷陀、憂摩陀、阿婆摩⁵⁸羅、人、非人等，悉共同聲唱如是言：「善哉！善哉！無上天尊多所利益。」說是語已，踊躍歡喜，或歌或舞、或身動轉，以種種華散佛及僧，所謂天優鉢羅華、拘物頭華、波頭摩華、分陀利華、曼陀羅華、摩訶曼陀羅華、曼殊沙華、摩訶曼殊沙華、散陀那華、摩訶散陀那華、盧脂那華、摩訶盧脂那華、香華、大香華、適意華、大適意華、愛見華、大愛見華、端嚴華、第一端嚴華。復散諸香，所謂沈水、多伽樓香、栴檀、鬱金、和合雜香、海岸聚香。復以天上寶幢、旛蓋、諸天妓樂箏、笛、笙、瑟、箜篌、鼓吹，供養於佛，而說偈言：

我今稽首大精進 無上正覺兩足尊
天人大眾所不知 唯有瞿曇乃能了
世尊往昔為我故 於無量劫修苦行
如何一旦棄本誓 而便捨命欲涅槃
一切眾生不能見 諸佛世尊祕密藏
以是因緣難得出 輪轉生死墜惡道
如佛所說阿羅漢 一切皆當至涅槃

⁵⁷ 大正藏：健

⁵⁸ 大正藏：魔

如是甚深佛行處 凡夫下愚誰能知
施諸眾生甘露法 為斷除彼諸煩惱
若有服此甘露已 不復受生老病死
如來世尊用⁵⁹療治 百千無量諸眾生
令其所有諸重病 一切消滅無遺餘
世尊久已捨病苦 故得名為第七佛
惟願今日雨法雨 潤漬我等功德種
是諸大眾及人天 如是請已默然住

說是偈時，蓮華臺中一切諸佛，從閻浮提遍至淨居，悉皆聞之。

爾時，佛告迦葉菩薩：「善哉！善哉！善男子，汝已具足如是甚深微妙智慧，不為一切諸魔外道之所破壞。善男子，汝已安住，不為一切諸邪惡⁶⁰風之所傾動。善男子，汝已成就樂說辯才，已曾供養過去無量恒河沙等諸佛世尊，是故能問如來正覺如是之義。

「善男子，我於往昔無量無邊億那由他百千萬劫已除病根，永離倚卧。迦葉，過去無量阿僧祇劫有佛出世，號無上勝如來、應供、正遍知、明行足、善逝、世間解、無上士、調御丈夫、天

⁵⁹ 大正藏：已

⁶⁰ 大正藏：惡邪

人師、佛、世尊，為諸聲聞說是大乘大涅槃經，開示分別，顯發其義。我於爾時，亦為彼佛而作聲聞，受持如是大涅槃典，讀誦通利，書寫經卷，廣為他人開示分別解說其義，以是善根，迴向阿耨多羅三藐三菩提。

「善男子，我從是來，未曾有惡煩惱業緣墮於惡道，誹謗正法，作一闡提，受黃門身、無根、二根，反逆父母，殺阿羅漢，破塔壞僧，出佛身血，犯四重禁。從是以⁶¹來，身心安隱，無諸苦惱。

「迦葉，我今實無一切疾病。所以者何？諸佛世尊久已遠離一切病故。迦葉，是諸眾生不知大乘方等密語⁶²，便謂如來真實有疾。

「迦葉，如言如來人中師子，而如來者，實非師子，如是之言，即是如來祕密之教。迦葉，如言如來人中大龍，而我已於無量劫中，捨離是業。迦葉，如言如來是人是天，而我真實非人非天，亦非鬼、神、乾闥婆、阿脩羅、迦樓羅、緊那羅、摩睺羅伽，非我、非命，非可養育、非人、士夫，非作非不作，非受非不受，非世尊非聲聞，

⁶¹ 大正藏：已

⁶² 大正藏：教

非說非不說，如是等語皆是如來祕密之教。迦葉，如言如來猶如大海、須彌山王，而如來者，實非鹹味、同於石山，當知是語，亦是如來祕密之教。迦葉，如言如來如分陀利，而我實非分陀利也，如是之言，即是如來祕密之教。迦葉，如言如來猶如父母，而如來者，實非父母，如是之言，亦是如來祕密之教。迦葉，如言如來是大船師，而如來者，實非船師，如是之言，亦是如來祕密之教。迦葉，如言如來猶如商主，而如來者，實非商主，如是之言，亦是如來祕密之教。迦葉，如言如來能摧伏魔，而如來者，實無惡心欲令他伏，如是之言，皆是如來祕密之教。迦葉，如言如來能治癰瘡，而我實非治癰瘡師，如是之言，亦是如來祕密之教。迦葉，如我先說：『若有善男子、善女人，善能修治身、口、意業，捨命之時，雖有親族取其屍骸，或以火燒，或投大水，或棄塚間，狐、狼、禽獸競共食啖，然心意識即生善道，而是心法實無去來，亦無所至，直是前後相似相續，相貌不異。』如是之言，即是如來祕密之教。

「迦葉，我今言病亦復如是，亦是如來祕密之教。是故，顧命文殊師利：『吾今背痛，汝等當為四眾說法。』」

「迦葉，如來正覺實無有病，右脅而卧，亦不畢竟入於涅槃。迦葉，是大涅槃即是諸佛甚深禪定，如是禪定，非是聲聞、緣覺行處。

「迦葉，汝先⁶³所問：『如來何故倚卧不起、不索飲食、誡勅家屬修治產業？』迦葉，虛空之性亦無坐起、求索飲食、勅誡家屬修治產業，亦無去來、生滅老壯、出沒傷破、解脫繫縛，亦不自說，亦不說他，亦不自解，亦不解他，非安非病。善男子，諸佛世尊亦復如是，猶如虛空，云何當有諸病苦耶？

「迦葉，世有三人，其病難治：一，謗大乘；二，五逆罪；三，一闍提。如是三病，世中極重，悉非聲聞、緣覺之所能治。善男子，譬如有病，必死無⁶⁴治，若有瞻病隨意醫藥，若無瞻病隨意醫藥，如是之病，定不可治，當知是人，必死無⁶⁵疑。是三種人亦復如是，若有聲聞、緣覺、菩薩，或有說法，或不說法，不能令其發阿耨多羅三藐三菩提心。

「迦葉，譬如病人，若有瞻病隨意醫藥則可令差，若無此三，則不可差。聲聞、緣覺亦復如

⁶³ 大正藏：先；永樂北藏及龍藏：上

⁶⁴ 大正藏：難

⁶⁵ 大正藏：不

是，從佛菩薩得聞法已，即便能發阿耨多羅三藐三菩提心，非不聞法能發心也。

「迦葉，譬如病人，若有瞻病隨意醫藥，若無瞻病隨意醫藥，皆悉可差。有一種人亦復如是，或值聲聞、不值聲聞，或值緣覺、不值緣覺，或值菩薩、不值菩薩，或值如來、不值如來，或得聞法、不得聞法⁶⁶，自然得成阿耨多羅三藐三菩提。所謂有人，或為自身，或為他身，或為怖畏，或為利養，或為諛諂，或為誑他，書寫如是大涅槃經，受持讀誦，供養恭敬，為他說者。

「迦葉，有五種人於是大乘大涅槃典有病行處，非如來也。何等為五？一，斷三結得須陀洹果，不墮地獄、畜生、餓鬼，人天七反⁶⁷，永斷諸苦，入於涅槃。迦葉，是名第一有病行處。是人未來過八萬劫，便當得成阿耨多羅三藐三菩提。

「迦葉，第二人者，斷三結縛，薄貪、恚、癡，得斯陀含果，一往來，永斷諸苦，入於涅槃。迦葉，是名第二有病行處。是人未來過六萬劫，便當得成阿耨多羅三藐三菩提。

「迦葉，第三人者，斷五下結，得阿那含果，

⁶⁶ 大正藏：或不聞法

⁶⁷ 大正藏：返

更不來此，永斷諸苦，入於涅槃。是名第三有病行處。是人未來過四萬劫，便當得成阿耨多羅三藐三菩提。

「迦葉，第四人者，永斷貪欲、瞋恚、愚癡，得阿羅漢果，煩惱無餘，入於涅槃，亦非麒麟獨一之行。是名第四人有病行處。是人過二萬劫，便當得成阿耨多羅三藐三菩提。

「迦葉，第五人者，永斷貪欲、瞋恚、愚癡，得辟支佛道，煩惱無餘，入於涅槃，真是麒麟獨一之行。是名第五人有病行處。是人未來過十千劫，便當得成阿耨多羅三藐三菩提。

「迦葉，是名第五人有病行處，非如來也。」

大般涅槃經卷第十

大般涅槃經卷第十一

北涼天竺三藏曇無讖譯 梵

宋沙門慧嚴慧觀同謝靈運再治

聖行品第十九之一

爾時，佛告迦葉菩薩：「善男子，菩薩摩訶薩，應當於是大般涅槃經⁶⁸，專心思惟五種之行。何等為五？一者，聖行；二者，梵行；三者，天行；四者，嬰兒行；五者，病行。善男子，菩薩摩訶薩常當修習是五種行。復有一行是如來行，所謂大乘大涅槃經。

「迦葉，云何菩薩摩訶薩所修聖行？菩薩摩訶薩若從聲聞、若從如來得聞如是大涅槃經，聞已生信，信已應作如是思惟：『諸佛世尊有無上道，有大正法，大眾正行，復有方等大乘經典。我今當為愛樂貪求大乘經故，捨離所愛妻子眷屬、所居舍宅、金銀珍寶、微妙瓔珞、香華妓⁶⁹樂、奴僕給使、男女大小、象馬車乘、牛羊雞犬猪豕之屬。』復作是念：『居家逼迫猶如牢獄，一切煩

⁶⁸ 大正藏：應當於大般涅槃經

⁶⁹ 大正藏：伎

惱由之而生。出家閑曠猶如虛空，一切善法因之增長。若在家居，不得盡壽淨修梵行，我今應當剃除鬚⁷⁰髮，出家學道。』復作是念：『我今定當出家修學無上正真菩提之道。』菩薩如是欲出家時，天魔波旬生大苦惱言：『是菩薩復當與我興大戰爭。』

「善男子，如是菩薩云何當復與人戰爭？是時，菩薩即至僧坊，若見如來及佛弟子威儀具足，諸根寂靜，其心柔和，清淨寂滅，即至其所而求出家，剃除鬚髮，服三法衣。既出家已，奉持禁戒，威儀不缺，進止安庠⁷¹，無所觸犯，乃至小罪心生怖畏，護戒之心猶如金剛。

「善男子，譬如有人，帶持浮囊欲度⁷²大海。爾時，海中有一羅刹，即從此人乞索浮囊。其人聞已，即作是念：『我今若與，必定沒死。』答言：『羅刹，汝寧殺我，浮囊叵得。』羅刹復言：『汝若不能全與我者，見惠其半。』是人猶故不肯與之。羅刹復言：『汝若不能惠我半者，幸願與我三分之一。』是人不肯。羅刹復言：『若不能者，施我手許。』是人不肯。羅刹復言：『汝今若復不

⁷⁰ 大正藏：鬚

⁷¹ 大正藏：祥

⁷² 大正藏：渡

能與我如手許者，我今飢窮，眾苦所逼，願當濟我如微塵許。』是人復言：『汝今所索，誠復不多，然我今日，方當度⁷³海，不知前途⁷⁴近遠云⁷⁵何。若與汝者，氣當漸出，大海之難，何由得過脫能⁷⁶？中路没水而死。』

「善男子，菩薩護持禁戒亦復如是，如彼度人護惜浮囊。菩薩如是守護戒時，常有煩惱諸惡羅刹語菩薩言：『汝當信我，終不相欺。但破四禁，護持餘戒，以是因緣，令汝安隱，得入涅槃。』菩薩爾時，應作是言：『我今寧持如是禁戒墮阿鼻獄，終不毀犯而生天上。』煩惱羅刹復作是言：『汝若不能破四禁者，可破僧殘。以是因緣，令汝安隱，得入涅槃。』菩薩亦應不隨其語。羅刹復言：『汝⁷⁷若不能犯僧殘者，亦可故犯偷蘭遮罪。以是因緣，令汝安隱，得入涅槃。』菩薩爾時，亦復不隨。羅刹復言：『汝若不能犯偷蘭遮，可犯捨墮。以是因緣，可得安隱，入於涅槃。』菩薩爾時，亦復不隨。羅刹復言：『汝若不能犯捨墮者，可破波夜提。以是因緣，令汝安隱，得入

⁷³ 大正藏：渡

⁷⁴ 大正藏：道

⁷⁵ 大正藏：如

⁷⁶ 大正藏：能脫

⁷⁷ 大正藏：卿

涅槃。』菩薩爾時，亦復不隨。羅刹復言：『汝若不能犯波夜提者，幸可毀破突吉羅戒。以是因緣，可得安隱，入於涅槃。』菩薩爾時，心自念言：『我今若犯突吉羅罪不發露者，則不能度生死彼岸而得涅槃。』菩薩摩訶薩，於是微小諸戒律中，護持堅固，心如金剛。

「菩薩摩訶薩持四重禁及突吉羅，敬重堅固，等無差別。菩薩若能如是堅持，則為具足五支諸戒，所謂具足菩薩根本業清淨戒、前後眷屬餘清淨戒、非諸惡覺覺清淨戒、護持正念念清淨戒、迴向阿耨多羅三藐三菩提戒。

「迦葉，是菩薩摩訶薩復有二種戒：一者，受世教戒；二者，得正法戒。菩薩若得正法戒者，終不為惡。受世戒者，白四羯磨然後乃得。

「復次，善男子，有二種戒：一者，性重戒；二者，息世譏嫌戒。性重戒者，謂四禁也。息世譏嫌戒者，不作販賣輕稱⁷⁸小斗欺誑於人、因他形勢取人財物、害心繫縛、破壞成功、燃明而卧、田宅種植、家業坐肆。不畜象馬車乘、牛、羊、駝、驢、雞、犬、獼猴、孔雀、鸚鵡、共命，及拘枳羅、豺、狼、虎、豹、猫、狸、猪、豕，及

⁷⁸ 大正藏：秤

餘惡獸、童男、童女、大男、大女、奴婢、僮僕、金、銀、瑠璃、玻瓈、真珠、碑磔、碼碯、珊瑚、璧玉、珂貝、諸寶、赤銅、白鐵、鍮石、盂器、毳毼⁷⁹、毼毼⁸⁰、拘執茸⁸¹衣、一切穀米、大小麥豆、黍、粟、稻、麻、生熟食具。常受一食，未⁸²曾再食。若行乞食及僧中食，常知止足，不受別請。不食肉，不飲酒，五辛葷物悉不食之，是故其身無有臭穢，常為諸天、一切世人恭敬供養，尊重讚歎。趣足而食，終不長受。所受衣服，纔足覆身。進止常與三衣鉢具，終不捨離，如鳥二翼。不畜根子、莖子、節子、莖⁸³子、子子，不畜庫⁸⁴藏若金若銀、飲食厨庫、衣裳服飾。高廣大床、象牙金床、雜色編織，悉不坐卧。不畜一切細軟諸席，不坐一切象薦、馬薦，不以細軟上妙衣裳⁸⁵用敷床卧。其止息床不置二枕，亦不受畜妙好丹枕、安簧⁸⁶木枕。終不觀視象鬪、馬鬪、車鬪、兵鬪、若男、若女、牛、羊、雞、雉、鸚鵡等鬪，亦不故往觀視軍陣；亦不故聽吹貝、鼓、

⁷⁹ 大正藏：穉毼

⁸⁰ 大正藏：毼毼

⁸¹ 大正藏：蕘

⁸² 大正藏：不

⁸³ 大正藏：接

⁸⁴ 大正藏：寶

⁸⁵ 大正藏：服

⁸⁶ 大正藏：黃

角、琴、瑟、箏、笛、箜篌、歌叫、妓樂之聲，除供養佛；樗⁸⁷蒲、圍棋⁸⁸、波羅塞戲、師子、象鬪、彈碁、六博、拍毬、擲石、投壺、牽道、八道行成，一切戲笑悉不觀作。終不占⁸⁹相手、足、面目，不以爪鏡、蓍⁹⁰草、楊枝、鉢盂、髑髏而作卜筮，亦不仰觀虛空星宿，除欲解睡；不作王家往返使命，以此語彼，以彼語此，終不諛諂邪命自活，亦不宣說王臣、盜賊、鬪爭、飲食、國土饑饉恐怖、豐樂安隱之事。

「善男子，是名菩薩摩訶薩息世譏嫌戒。

「善男子，菩薩摩訶薩堅持如是遮制之戒，與性重戒等無差別。

「善男子，菩薩摩訶薩受持如是諸禁戒已，作是願言：『寧以此身，投於熾然猛火深坑，終不毀犯過去、未來、現在諸佛所制禁戒，與刹利、婆羅門、居士等女而行不淨。』復次，善男子，菩薩摩訶薩復作是願：『寧以熱鐵周帀纏身，終不敢以破戒之身而受信心檀越衣服。』復次，善男子，菩薩摩訶薩復作是願：『寧以此口吞熱鐵丸，終不敢以毀戒之口而食信心檀越飲食。』復

⁸⁷ 大正藏：樗

⁸⁸ 大正藏：碁

⁸⁹ 大正藏：瞻

⁹⁰ 大正藏：芝

次，善男子，菩薩摩訶薩復作是願：『寧卧此身大熱鐵上，終不敢以破戒之身受信心檀越床卧敷具。』復次，善男子，菩薩摩訶薩復作是願：『寧以此身受三百矛⁹¹，終不敢以毀戒之身而受信心檀越醫藥。』復次，善男子，菩薩摩訶薩復作是願：『寧以此身投熱鐵鑊，終不敢以破戒之身受信心檀越房舍、屋宅。』復次，善男子，菩薩摩訶薩復作是願：『寧以鐵椎打碎此身，從頭至足令如微塵，不以破戒之身受⁹²諸刹⁹³利、婆羅門、居士恭敬禮拜。』復次，善男子，菩薩摩訶薩復作是願：『寧以熱鐵挑其兩目，不以染心視他好色。』復次，善男子，菩薩摩訶薩復作是願：『寧以鐵錐周遍刺耳⁹⁴，不以染心聽好音聲。』復次，善男子，菩薩摩訶薩復作是願：『寧以利刀割去其鼻，不以染心貪嗅諸香。』復次，善男子，菩薩摩訶薩復作是願：『寧以利刀割裂其舌，不以染心貪著美味。』復次，善男子，菩薩摩訶薩復作是願：『寧以利斧斬破⁹⁵其身，不以染心貪著諸觸。』何以故？以是因緣能令行者墮於地獄、畜

⁹¹ 大正藏：鉞

⁹² 大正藏：不以破戒受；永樂北藏及龍藏：不以破戒之身受

⁹³ 大正藏：刹；永樂北藏：利；龍藏：刹

⁹⁴ 大正藏：身

⁹⁵ 大正藏：斫

生、餓鬼。

「迦葉，是名菩薩摩訶薩護持禁戒。

「菩薩摩訶薩護持如是諸禁戒已，悉以施與一切眾生，以是因緣，願令眾生護持禁戒，得清淨戒、善戒、不缺戒、不析戒、大乘戒、不退戒、隨順戒、畢竟戒、具足成就波羅蜜戒。

「善男子，菩薩摩訶薩修持如是清淨戒時，即得住於初不動地。云何名為不動地？菩薩住是不動地中，不動不墮，不退不散。善男子，譬如須彌山，隨藍猛風不能令動、墮落、退散。菩薩摩訶薩住是地中，亦復如是，不為色、聲、香、味所動，不墮地獄、畜生、餓鬼，不退聲聞、辟支佛地，不為異見邪風所散而作邪命。復次，善男子，又，不動者，不為貪欲、恚、癡所動。又，不墮者，不墮四重。又，不退者，不退戒還家⁹⁶。又，不散者，不為違逆大乘經者之所散壞。復次，菩薩摩訶薩亦復不為諸煩惱魔之所傾動，不為陰魔所墮，乃至坐於道場菩提樹下，雖有天魔，不能令其退阿耨多羅三藐三菩提，亦復不為死魔所散。善男子，是名菩薩修習聖行。

「善男子，云何名為聖行？聖行者，佛及菩

⁹⁶ 大正藏：不退還家

薩之所行故，故名聖行。以何等故名佛菩薩為聖人耶？如是等人有聖法故，常觀諸法性空寂故。以是義故，故名聖人。有聖戒故，故名聖人；有聖定、慧故，故名聖人；有七聖財，所謂信、戒、慚、愧、多聞、智慧、捨離故，故名聖人；有七聖覺故，故名聖人。以是義故，復名聖行。

「復次，善男子，菩薩摩訶薩聖行者，觀察是身從頭至足，其中唯有髮毛爪齒、不淨垢穢、皮肉筋骨、脾腎心肺、肝膽腸胃、生熟二臟⁹⁷、大小便利、涕唾目淚、肪膏腦膜、骨髓膿血、腦骸⁹⁸諸脈。菩薩如是專念觀時，：『誰有是我？我為屬誰？住在何處？誰屬於我？』復作是念：『骨是我耶？離骨是乎⁹⁹？』菩薩爾時，除去皮肉，唯觀白骨，復作是念：『骨色相異，所謂青、黃、白色、鵠色，如是骨相亦復非我。何以故？我者亦非青、黃、白色，及以鵠色。』菩薩繫心作是觀時，即得斷除一切色欲。

「復作是念：『如是骨者從因緣生。依因足骨以拄踝骨，依因踝骨以拄躡骨，依因躡骨以拄膝骨，依因膝骨以拄髀骨，依因髀骨以拄臑骨，

⁹⁷ 大正藏：藏

⁹⁸ 大正藏：骸

⁹⁹ 大正藏：耶

依因臑骨以拄腰骨，依因腰骨以拄脊骨，依因脊骨以拄肋骨；復因脊骨上拄項骨，依因項骨以拄頷骨，依因頷骨以拄牙齒，上有髑髏；復因項骨以拄肩骨，依因肩骨以拄臂骨，依因臂骨以拄腕骨，依因腕骨以拄掌骨，依因掌骨以拄指骨。』
菩薩摩訶薩如是觀時，身所有骨一切分離。得是觀已，即斷三欲：一，形貌欲；二，姿態欲；三，細觸欲。

「菩薩摩訶薩觀青骨時，見此大地，東西南北，四維上下，悉皆青相。如青色觀，黃、白、鵝色亦¹⁰⁰復如是。菩薩摩訶薩作是觀時，眉間即出青、黃、赤、白、鵝等色光。菩薩於是一一諸光明中見有佛像，見已即問：『如此身者，不淨因緣和合共成，云何而得坐起行住、屈伸俯仰、視瞬喘息、悲泣喜笑？此中無主，誰使之爾？』作是問已，光中諸佛忽然不現。復作是念：『或識是我，故使諸佛不為我說。』復觀此識，次第生滅猶如流水，亦復非我。復作是念：『若識非我，出息、入息或能是我。』復作是念：『此¹⁰¹出、入息直是風性，而是風性乃是四大，四大之中，

¹⁰⁰ 大正藏：亦；永樂北藏：亦；龍藏：不

¹⁰¹ 大正藏：是

何者是我？地性非我，水、火、風性亦復非我。』復作是念：『此身一切悉無有我，唯有心風因緣和合，示現種種所作事業，譬如呪力、幻術所作，亦如箜篌隨意出聲。是故，此身如是不淨，假眾因緣和合共成，當於何處而生貪欲？若彼¹⁰²罵辱，復於何處而生瞋恚？如我此身三十六物不淨、臭穢，何處當有受罵辱者？』若聞其罵，即便思惟：『以何音聲而見罵耶？一一音聲不能見罵，若一不能，眾多亦爾，以是義故，不應生瞋。』若他來打，亦應思惟：『如是打者，從何而生？』復作是念：『因手、刀、杖及以我身故得名打。我今何緣橫瞋於他？乃是我身自招此咎，以我受是五陰身故。譬如因的則有箭中，我身亦爾，有身有打。我若不忍，心則散亂；心若散亂，則失正念；若失正念，則不能觀善不善義；若不能觀善不善義，則行惡法；惡法因緣則墮地獄、畜生、餓鬼。』菩薩爾時作是觀已，得四念處。得四念處已，則得住於堪忍地中。菩薩摩訶薩住是地已，則能堪忍貪欲、恚、癡，亦能堪忍寒熱飢渴、蚊虻蚤蟲、暴風惡觸、種種疾疫、惡口罵詈、搥打楚撻，身心苦惱一切能忍，是故名為住堪忍地。」

¹⁰² 大正藏：被

迦葉菩薩白佛言：「世尊！菩薩未得住不動地，淨持戒時，頗有因緣得破戒不？」

「善男子，菩薩未得住不動地，有因緣故可得破戒。」

迦葉言：「唯然，世尊！何者是耶？」

佛告迦葉：「若有菩薩，知以破戒因緣，則能令人受持愛樂大乘經典，又能令其讀誦、通利、書寫經卷、廣為人¹⁰³說、不退轉於阿耨多羅三藐三菩提，為如是故，故得破戒。菩薩爾時，應作是念：『我寧一劫若減一劫墮阿鼻地獄受此罪報，要令是人不退轉於阿耨多羅三藐三菩提。』迦葉，以是因緣，菩薩摩訶薩得毀淨戒。」

爾時，文殊師利菩薩白佛言：「世尊！若有菩薩攝取護持如是之人，令不退轉菩提之心，為是毀戒，若墮阿鼻地獄，無有是處。」

爾時，佛讚文殊師利：「善哉！善哉！如汝所說。我念往昔於閻浮提作大國王，名曰仙豫¹⁰⁴，愛念敬重大乘經典，其心純善，無有麤惡、嫉妬、慳吝，口常宣說愛語、善語，身常攝護貧窮、孤獨，布施、精進無有休廢。時世無佛、聲聞、緣

¹⁰³ 大正藏：他

¹⁰⁴ 大正藏：預

覺。我於爾時，愛樂大乘方等經典，十二年中事婆羅門，供給所須。過十二年施安已訖，即作是言：『師等今應發阿耨多羅三藐三菩提心。』婆羅門言：『大王，菩提之性は無所有，大乘經典亦復如是。大王云何乃欲令人同於虛空？』善男子，我於爾時，心重大乘，聞婆羅門誹謗方等，聞已即時斷其命根。善男子，以是因緣，從是已來不墮地獄。善男子，擁護、攝持大乘經典，乃有如是無量勢力。

「復次，迦葉，又有聖行，所謂四聖諦，苦、集、滅、道。迦葉，苦者，逼迫相；集者，能生長相；滅者，寂滅相；道者，大乘相。復次，善男子，苦者，現相；集者，轉相；滅者，除相；道者，能除相。復次，善男子，苦者有三相：苦苦相、行苦相、壞苦相；集者，二十五有；滅者，滅二十五有；道者，修戒、定、慧。

「復次，善男子，有漏法者有二種，有因有果；無漏法者亦有二種，有因有果。有漏果者，是則名苦；有漏因者，則名為集；無漏果者，則名為滅；無漏因者，則名為道。

「復次，善男子，八相名苦，所謂生苦、老苦、病苦、死苦、愛別離苦、怨憎會苦、求不得

苦、五盛陰苦；能生如是八苦法者，是名為集；無有如是八苦¹⁰⁵之處，是名為滅；十力、四無所畏、三念處、大悲，是名為道。

「善男子，生者出相，所謂五種：一者，初出；二者，至終；三者，增長；四者，出胎；五者，種類生。

「何等為老？老有二種：一，念念老；二，終身老。復有二種：一，增長老；二，滅壞老。是名為老。

「云何為病？病謂四大毒蛇互不調適，亦有二種：一者，身病；二者，心病。身病有五：一者，因水；二者，因風；三者，因熱；四者，雜病；五者，客病。客病有四：一者，非分強作；二者，忘誤墮落；三者，刀杖瓦石；四者，鬼魅所著。心病亦有四種：一者，踊躍；二者，恐怖；三者，憂愁；四者，愚癡。復次，善男子，身心之病凡有三種。何等為三？一者，業報；二者，不得遠離惡對；三者，時節代謝。生如是等因緣、名字、受分別病。因緣者，風等諸病；名字者，心悶肺脹、上氣嗽逆、心驚下痢；受分別者，頭痛、目痛、手足等痛。是名為病。

¹⁰⁵ 大正藏：法

「何等為死？死者，捨所受身。捨所受身亦有二種：一，命盡死；二，外緣死。命盡死者亦有三種：一者，命盡非是福盡；二者，福盡非是命盡；三者，福命俱盡。外緣死者亦有三種：一者，非分自害死；二者，橫為他死；三者，俱死。又有三種死：一，放逸死；二，破戒死；三，壞命根死。何等名為放逸死？若有誹謗大乘方等般若波羅蜜，是名放逸死。何等名為破戒死？毀犯去、來、現在諸佛所制禁戒，是名破戒死。何等名為壞命根死？捨五陰身，是名壞命根死。如是名曰死為大苦。

「何等名為愛別離苦？所愛之物破壞離散。所愛之物破壞離散亦有二種：一者，人中五陰壞；二者，天中五陰壞。如是人天所受¹⁰⁶五陰分別校計有無量種，是名愛別離苦。

「何等名為怨憎會苦？所不愛者而共聚集。所不愛者而共聚集亦有三種，所謂地獄、餓鬼、畜生。如是三趣分別校¹⁰⁷計有無量種，如是則名怨憎會苦。

「何等名為求不得苦？求不得苦亦有二種：

¹⁰⁶ 大正藏：愛

¹⁰⁷ 大正藏：校

一者，所希望處求不能得；二者，多用功力不得果報，如是則名求不得苦。

「何等名為五盛陰苦？五盛陰苦者，生苦、老苦、病苦、死苦、愛別離苦、怨憎會苦、求不得苦，是故名為五盛陰苦。

「迦葉，生之根本，凡有如是七種之苦，老苦乃至五盛陰苦。迦葉，夫衰老者，非一切有。佛及諸天，一向定無；人中不定，或有或無。迦葉，三界受身，無不有生，老不必定，是故一切生為根本。

「迦葉，世間眾生顛倒覆心，貪著生相，厭患老死；菩薩不爾，觀於初生已見過患。迦葉，如有女人入於他舍。是女端正，顏貌美麗，以好瓔珞莊嚴其身。主人見已，即便問言：『汝字何等？繫屬於誰？』女人答言：『我身即是功德大天。』主人問言：『汝所至處為何所作？』女天答言：『我所至處能與種種金、銀、瑠璃、玻瓈、真珠、珊瑚、琥珀、碑磬、碼碯、象馬車乘、奴婢、僕使。』主人聞已，心生歡喜，踊躍無量：

『我今福德故，令汝來至我舍宅。』即便燒香、散華，供養、恭敬、禮拜。復於門外更見一女，其形醜陋，衣裳弊壞，多諸垢膩，皮膚皴裂，其

色艾白。見已問言：『汝字何等？繫屬於誰？』
女人答言：『我字黑闇。』復問：『何故名為黑闇？』
女人答言：『我所行處，能令其家所有財寶一切
衰耗。』主人聞已，即持利刀作如是言：『汝若不
去，當斷汝命。』女人答言：『汝甚愚癡，無有智
慧。』主人問言：『何故名我癡無智慧？』女人答
言：『汝家中者，即是我姊，我常與姊，進止共
俱。汝若驅我，亦當驅彼¹⁰⁸。』主人還入，問功
德天：『外有一女，云是汝妹，實為是不？』功
德天言：『實是我妹，我與此妹，行住共俱，未
曾相離。隨所住處，我常作好，彼當¹⁰⁹作惡；我
作利益，彼作衰損。若愛我者，亦應愛彼；若見
恭敬，亦應敬彼。』主人即言：『若有如是好惡事
者，我皆不用，各隨意去。』是時，二女便共相
將還其所止。爾時，主人見其還去，心生歡喜，
踊躍無量。是時，二女復共相隨至一貧家。貧人
見已，心生歡喜，即請之言：『從今已往，願汝
二人，常住我家。』功德天言：『我等先以¹¹⁰為他
所驅，汝復何緣俱請我住？』貧人答言：『汝今
念我，我以汝故，復當敬彼，是故俱請，令住我

¹⁰⁸ 大正藏：姊

¹⁰⁹ 大正藏：常

¹¹⁰ 大正藏：已

家。』迦葉，菩薩摩訶薩亦復如是，不願生天，以生當有老、病、死故，是以俱棄，曾無受心。凡夫愚人不知老、病、死等過患，是故貪受生死二法。

「復次，迦葉，如婆羅門幼稚童子，為飢所逼，見人糞中有菴羅果，即便取之。有智見已，呵責之言：『汝婆羅門種姓清淨，何故取是糞中穢菓？』童子聞已，赧然有愧，即答之言：『我實不食，為欲洗淨還棄捨之。』智者語言：『汝大愚癡，若還棄者，本不應取。』善男子，菩薩摩訶薩亦復如是，於此生分不受不捨，如彼智者呵責童子；凡夫之人欣生惡死，如彼童子取菓還棄。

「復次，迦葉，譬如有人，四衢道頭器盛滿食，色香味具，而欲賣之。有人遠來，飢虛羸乏，見其飯食色香味具，即指問言：『此是何物？』食主答言：『此是上食，色香味具。若食此食，得色、得力、能除飢渴、得見諸天，唯有一患，所謂命終。』是人聞已，即作是念：『我今不用色、力、見天，亦不用死。』即作是言：『食是食已若命終者，汝今何為於此賣之？』食主答言：『有智之人終不肯買，唯有愚人不知是事，多與我價，貪而食之。』善男子，菩薩摩訶薩亦復如是，不

願生天、得色、得力、見於諸天。何以故？以其不免諸苦惱故。凡夫愚癡，隨有生處皆悉貪愛，以其不見老、病、死故。

「復次，迦葉¹¹¹，譬如毒樹，根能殺人，枝幹、莖節、皮葉、華實悉亦能殺。善男子，二十五有受生之處，所受五陰亦復如是，一切能殺。

「復次，迦葉，譬如糞穢，多少俱臭。善男子，生亦如是，設受¹¹²八萬下至十歲，俱亦受苦。

「復次，迦葉，譬如嶮岸，上有草覆，於彼岸邊，多有甘露，若有食者，壽命¹¹³千年，永除諸病，安隱快樂。凡夫愚人貪其味故，不知其下有大深坑，即前欲取，不覺腳跌，墮坑而死。智者知己，捨離遠去。善男子，菩薩摩訶薩亦復如是，尚不欲受天上妙食，況復人中？凡夫之人乃於地獄吞啖鐵丸，況復人、天上妙餚饌而能不食？

「迦葉，以如是譬及餘無量無邊譬喻，當知是生實為大苦。迦葉，是名菩薩住於大乘大涅槃經觀於生苦。

「迦葉，云何菩薩於是大乘大涅槃經觀於老

¹¹¹ 大正藏：復次，善男子

¹¹² 大正藏：壽；永樂北藏及龍藏：受

¹¹³ 大正藏：天

苦？老者，能為嗽逆上氣，能壞勇力；憶念進持盛年快樂，憍慢貢高，安隱自恣；能作背偻，懈怠懶墮，為他所輕。迦葉，譬如池水，蓮華滿中，開敷鮮榮，甚可愛樂；值天降雹，悉皆破壞。善男子，老亦如是，悉能破壞盛壯好色。

「復次，迦葉，譬如國王，有一智臣，善知兵法，有敵國王，拒逆不順，王遣此臣，往討伐之，即便擒獲，將來詣王。老亦如是，擒獲壯色，將付死王。

「復次，迦葉，譬如折軸，無所復用；老亦如是，無所復用。

「復次，迦葉，如大富家，多有財寶，金、銀、琉璃、珊瑚、琥珀、硨磲、碼碯。有諸怨賊，若入其家，即能劫奪，悉令空盡。善男子，盛年好色亦復如是，常為老賊之所劫奪。

「復次，迦葉，譬如貧人，貪著上膳¹¹⁴細軟衣裳，雖復希望而不能得。善男子，老亦如是，雖有貪心，欲受富樂，五欲自恣，而不能得。

「復次，迦葉，如陸地龜，心常念水。善男子，人亦如是，既為衰老之所乾枯，心常憶念壯時所受五欲之樂。

¹¹⁴ 大正藏：饍

「復次，迦葉，猶如秋月所有蓮華，皆為一切之所愛¹¹⁵見；及其萎黃，人所惡賤。善男子，盛年壯色亦復如是，悉為一切之所愛樂；及其老至，眾所惡賤。

「復次，迦葉，譬如甘蔗，既被壓已，滓無復味。壯年盛色亦復如是，既被老壓，無三種味：一，出家味；二，讀誦味；三，坐禪味。

「復次，迦葉，譬如滿月，夜多光明，晝則不爾。善男子，人亦如是，壯則端嚴，形貌瓌偉¹¹⁶；老則衰羸，形神枯悴¹¹⁷。

「復次，迦葉，譬如有王，常以正法治國理民，直¹¹⁸實無曲，慈憫好施。時，為敵國之所破壞，流離逃迸，遠至他土。他土人民見而憫之，咸作是言：『大王往日正法治國，不枉萬姓，如何一旦流離至此？』善男子，人亦如是，既為衰老所壞敗已，常讚壯時，所行事業。

「復次，迦葉，譬如燈炷，唯賴膏油，膏油既盡，勢不久停。善男子，人亦如是，唯賴壯膏，壯膏既盡，衰老之炷何得久停？

「復次，迦葉，譬如枯河，不能利益人及非

¹¹⁵ 大正藏：樂

¹¹⁶ 大正藏：瑋

¹¹⁷ 大正藏：頽

¹¹⁸ 大正藏：真

人、飛鳥、走獸。善男子，人亦如是，為老所枯，不能利益一切作業。

「復次，迦葉，譬如河岸臨嶮之¹¹⁹樹，若遇暴風，必當顛墜。善男子，人亦如是，臨老險岸，死風既至，勢不得住。

「復次，迦葉，如車軸折，不任重載。善男子，老亦如是，不能咨受一切善法。

「復次，迦葉，譬如嬰兒，為人所輕。善男子，老亦如是，常為一切之所輕毀。

「迦葉，以是等譬及餘無量無邊譬喻，當知是老，實為大苦。迦葉，是名菩薩修行¹²⁰大乘大涅槃經觀於老苦。

「迦葉，云何菩薩摩訶薩修行大乘大涅槃經觀於病苦？所謂病者，能壞一切安隱樂事，譬如雹雨，傷壞穀苗。

「復次，迦葉，如人有怨，心常憂愁而懷恐怖。善男子，一切眾生亦復如是，常畏病苦，心懷憂感。

「復次，迦葉，譬如有人，形貌端正，為王夫人欲心所愛，遣信逼呼¹²¹，與共交通。時王收

¹¹⁹ 大正藏：大

¹²⁰ 大正藏：是名菩薩摩訶薩修行大乘

¹²¹ 大正藏：喚

¹²²得，挑其一目，截其一耳，斷一手足。是人爾時，形容改異，人所惡賤。善男子，人亦如是，先雖端嚴，耳目具足，既為病苦所纏逼已，則為眾人之所惡賤。

「復次，迦葉，譬如芭蕉、竹葦及驪，有子則死。善男子，人亦如是，有病則死。

「復次，迦葉，如轉輪王，主兵大臣常在前導，王隨後行；亦如魚王、螳¹²³王、螺¹²⁴王、牛王、商主，在前行時，如是諸眾，悉皆隨從，無捨離者。善男子，死轉輪王亦復如是，常隨病臣，不相捨離；魚、螳、螺、牛、商主病王亦復如是，常為死眾之所隨逐。

「迦葉，病因緣者，所謂苦惱、憂愁¹²⁵、悲歎¹²⁶、身心不安；或為怨賊之所逼害，破壞浮囊，發撤¹²⁷橋梁；亦能劫奪正命¹²⁸根本，復能破壞盛壯好色、力勢、安樂，除捨慚愧，能為身心焦熱熾然。

「以是等譬及餘無量無邊譬喻，當知病苦是

¹²² 大正藏：捕

¹²³ 大正藏：蟻

¹²⁴ 大正藏：蝨

¹²⁵ 大正藏：愁憂

¹²⁶ 大正藏：嘆

¹²⁷ 大正藏：撥撤

¹²⁸ 大正藏：念

為大苦。迦葉，是名菩薩摩訶薩修行大乘大涅槃經觀於病苦。

「迦葉，云何菩薩修行大乘大涅槃經觀於死苦？所謂死者，能燒滅故。

「迦葉，如火災起，能燒一切，唯除二禪，力不至故。善男子，死火亦爾，能燒一切，唯除菩薩住於大乘大般涅槃，勢不及故。

「復次，迦葉，如水災起，一切漂沒，唯除三禪，力不至故。善男子，死水亦爾，漂沒一切，唯除菩薩住於大乘大般涅槃。

「復次，迦葉，如風災起，能吹一切，悉令散滅，唯除四禪，力不至故。善男子，死風亦爾，悉能吹滅一切所有，唯除菩薩住於大乘大般涅槃。」

迦葉菩薩白佛言：「世尊！彼第四禪，以何因緣，風不能吹，水不能漂，火不能燒？」

佛告迦葉：「善男子，彼第四禪，內外過患一切無故。善男子，初禪過患，內有覺觀，外有火災；二禪過患，內有歡喜，外有水災；三禪過患，內有喘息，外有風災。善男子，彼第四禪，內外過患一切悉無，是故諸災不能及之。善男子，菩薩摩訶薩亦復如是，安住大乘大般涅槃，內外

過患一切皆盡。是故，死王不能及之。

「復次，善男子，如金翅鳥，能啖能消一切龍、魚、金、銀等寶，唯除金剛不能令消。善男子，死金翅鳥亦復如是，能啖能消一切眾生，唯不能消住於大乘大般涅槃菩薩摩訶薩。

「復次，迦葉，譬如河岸所有草木，大水暴長¹²⁹，悉隨漂流入於大海，唯除楊柳，以其軟故。善男子，一切眾生亦復如是，悉皆隨流入于死海，唯除菩薩住於大乘大般涅槃。

「復次，迦葉，如那羅延悉能摧伏一切力士，唯除大風。何以故？以無礙故。善男子，死那羅延亦復如是，悉能摧伏一切眾生，唯除菩薩住於大乘大般涅槃。何以故？以無礙故。

「復次，迦葉，譬如有人，於怨憎中，詐現親善，常相追逐，如影隨形，伺求其便，而欲殺之。彼怨謹慎，堅牢自備，故使是人不能得殺。善男子，死怨亦爾，常伺眾生，而欲殺之，唯不能殺住於大乘大般涅槃菩薩摩訶薩。何以故？以是菩薩不放逸故。

「復次，迦葉，譬如卒降金剛暴¹³⁰雨，悉壞

¹²⁹ 大正藏：瀑漲

¹³⁰ 大正藏：瀑

藥木、諸樹、山林、土沙、瓦石、金銀、瑠璃一切之物，唯不能壞金剛真寶。善男子，金剛死雨亦復如是，悉能破壞一切眾生，唯除金剛菩薩住於大乘大般涅槃。

「復次，迦葉，如金翅鳥，能啖諸龍，唯不能啖受三歸者。善男子，死金翅鳥亦復如是，能啖一切無量眾生，唯除菩薩住三定者。何謂三定？空無相願。

「復次，迦葉，如摩羅毒蛇，凡有所螫，雖有良呪、上妙好藥，無如之何，唯阿竭多星呪能令除愈。善男子，死毒所螫亦復如是，一切醫方無如之何，唯除菩薩住於大乘大般涅槃呪。

「復次，迦葉，譬如有人，為王所瞋，其人若能以軟善語、貢上財寶便可得脫。善男子，死王不爾，雖以軟語、錢財、珍寶而貢上之，亦不得脫。善男子，夫死者，於險難處無有資糧，去處懸遠而無伴侶，晝夜常行不知邊際，深邃幽闇無有燈明，入無門戶而有處所，雖無痛處不可療治，往無遮止到不得脫，無所破壞見者愁毒，非是惡色而令人怖，敷在身邊不可覺知。

「迦葉，以是等譬及餘無量無邊譬喻，當知

是¹³¹死真為大苦。迦葉，是名菩薩修行大乘大涅槃經觀於死苦。

「迦葉，云何菩薩住於大乘大涅槃經觀愛別離苦？」

「愛別離苦能為一切眾苦根本。如說：

因愛生憂 因愛生畏¹³²

若離貪¹³³愛 何憂何畏¹³⁴

「愛因緣故，則生憂苦；以憂苦故，則令眾生於衰老愛別離苦，所謂命終。善男子，以別離故，能生種種微細諸苦，今當為汝分別顯示。

「善男子，過去之世人壽無量，時世有王，名曰善住，其王爾時，為童子身、太子治事及登王位各八萬四千歲。時，王頂上生一肉胞，其胞柔軟，如兜羅綿、細軟劫貝，漸漸增長不以為患。足滿十月，胞即開剖，生一童子，其形端正，奇異少雙，色像分明，人中第一。父王歡喜，字曰頂生。時，善住王即以國事委付頂生，棄捨宮殿、妻子、眷屬，入山學道，滿八萬四千歲。

「爾時，頂生於十五日，處在高樓，沐浴受

¹³¹ 大正藏：是；永樂北藏及龍藏：生

¹³² 大正藏：怖

¹³³ 大正藏：於

¹³⁴ 大正藏：怖

齋。即於¹³⁵東方有金輪寶，其輪千輻，轂輞具足，不由工匠，自然成就，而來應之。頂生大王即作是念：『我昔曾聞五通仙說：「若刹利王，於十五日處在高樓沐浴受齋，若有金輪，千輻不減，轂輞具足，不由工匠，自然成就，而來應者，當知是王即當得作轉輪聖帝。」』復作是念：『我今當試。』即以左手擎此輪寶，右執香爐，右膝著地而發誓言：『是金輪寶，若實不虛，應如過去轉輪聖王所行道法。』作是誓已，是金輪寶飛昇虛空遍十方已，還來住在頂生左手。爾時，頂生心生歡喜，踊躍無量，復作是言：『我今定作轉輪聖王。』

「其後不久，復有象寶，狀貌端嚴如白蓮華，七支拄地。頂生見已，復作是念：『我昔曾聞五通仙說：「若轉輪王，於十五日，處在高樓，沐浴受齋，若有象寶，狀貌端嚴如白蓮華，七支拄地，而來應者，當知是王即是聖帝。」』復作是念：『我今當試。』即擎香爐，右膝著地而發誓言：『是白象寶，若實不虛，應如過去轉輪聖王所行道法。』作是誓已，是白象寶，從旦至夕，周遍八方，盡大海際，還住本處。爾時，頂生心大歡

¹³⁵ 大正藏：時

喜，踊躍無量。復作是言：『我今定是轉輪聖王。』

「其後不久，次有馬寶，其色紺艷，髦尾金色。頂生見已，復作是念：『我昔曾聞五通仙說：「若轉輪王，於十五日，處在高樓，沐浴受齋，若有馬寶，其色紺艷，髦尾金色，而來應者，當知是王即是聖帝。』』復作是念：『我今當試。』即執香爐，右膝著地而發誓言：『是紺馬寶，若實不虛，應如過去轉輪聖王所行道法。』作是誓已，是紺馬寶從旦至夕周遍八方，盡大海際還住本處。爾時，頂生心大歡喜，踊躍無量。復作是言：『我今定是轉輪聖王。』

「其後不久，復有女寶，形容端正，微妙第一，不長不短，不白不黑，身諸毛孔出栴檀香，口氣香潔如青蓮華；其目遠視見一由旬，耳聞鼻嗅亦復如是，其舌廣大，出能覆面，形色細薄，如赤銅鑠¹³⁶。心識聰哲，有大智慧，於諸眾生常有軟語。是女以手觸王衣時，即知王身安樂病患，亦知王心所緣之處。爾時，頂生復作是念：『若有女人能知王心，即是女寶。』

「其後不久，於王宮內自然而有寶摩尼珠，純青瑠璃大如車轂，能於闇中照一由旬。若天降

¹³⁶ 大正藏：葉

雨，滂如車軸，是珠勢力能作大蓋覆一由旬，遮此大雨不令下過。爾時，頂生復作是念：『若轉輪王得是寶珠，必是聖帝。』

「其後不久，有主藏臣自然而出，多饒財寶，巨富無量，庫藏盈溢，無所乏少，報得眼根力能徹見一切地中所有伏藏，隨王所念，皆能辦之。爾時，頂生復欲試之，即共乘船入於大海，告藏臣言：『我今欲得珍異之寶。』藏臣聞已，即以兩手撓大海水，時十指頭出十寶藏，以奉聖王，而白王言：『大王所須，隨意用之，其餘在者，當投大海。』爾時，頂生心大歡喜，踊躍無量。復作念言：『我今定是轉輪聖王。』

「其後不久，有主兵臣自然而出，勇健猛略，策謀第一，善知四兵。若任鬪者，則現聖王；若不任者，退不令現。未摧伏者，能令摧伏；已摧伏者，力能守護。爾時，頂生復作是念：『若轉輪王得是兵寶，當知定是轉輪聖王。』

「爾時，頂生轉輪聖帝告諸大臣：『汝等當知，此閻浮提安隱豐樂，我今已有七寶成就、千子具足，更何所為？』諸臣答言：『唯然，大王，東弗婆提猶未歸德，王今應往。』爾時，聖王即與七寶、一切營從，飛空而往東弗婆提，彼土人

民歡喜歸化。

「復告大臣：『我閻浮提及弗婆提安隱豐樂，人民熾盛，悉來歸化，七寶成就，千子具足，復何所為？』諸臣答言：『唯然，大王，西瞿陀尼猶未歸德。』爾時，聖王復與七寶、一切營從，飛空而往西瞿陀尼。王既至彼，彼土人民亦復歸伏。

「復告大臣：『我閻浮提、及弗婆提、此瞿陀尼安隱豐樂，人民熾盛，悉來歸化¹³⁷，七寶成就，千子具足，復何所為？』諸臣答言：『唯然，大王，北鬱單越猶未歸化。』爾時，聖王復與七寶、一切營從，飛空而往北鬱單越。王既至彼，彼土人民歡喜歸德。

「復告大臣：『我四天下安隱豐樂，人民熾盛，咸已歸德，七寶成就，千子具足，更何所為？』諸臣答言：『唯然，聖王！三十三天壽命極長，安隱快樂。彼天身形端嚴無比，所居宮殿、床榻、卧具悉是七寶，自恃天福未來歸化，今應往討，令其摧伏。』

「爾時，聖王復與七寶、一切營從，飛騰虛空上忉利天，見有一樹，其色青綠。聖王見已，

¹³⁷ 大正藏：皆以歸化

即問大臣：『此是何色？』大臣答言：『此是波利質多羅樹，忉利諸天，夏三月時¹³⁸，常於其下娛樂受樂。』又見白色，猶如白雲，復問大臣：『彼是何色？』大臣答言：『是善法堂，忉利諸天常集其中，論人天事。』

「於是，天主釋提桓因知頂生王已來在外，即出迎逆。見已執手，昇善法堂，分座而坐。彼時，二王形容相貌，等無差別，唯有視眴為別異耳。是時，聖王即生念言：『我今寧可退彼王位，即住其中為天王不？』」

「善男子，爾時，帝釋受持讀誦大乘經典，開示分別為他演說，唯於深義未盡通達。以是讀誦、受持、分別為他廣說因緣力故，有大威德。善男子，是頂生王於此帝釋生惡心已，即便墮落還閻浮提，與所愛念人天離別，生大苦惱，復遇惡病，即便命終。爾時，帝釋，迦葉佛是；轉輪聖王則我身是。」

「善男子，當知如是愛別離者，極為大苦。善男子，菩薩摩訶薩尚憶過去如是等輩愛別離苦，何況菩薩住於大乘大涅槃經，而當不觀現在之世愛別離苦？」

¹³⁸ 大正藏：日

「善男子，云何菩薩修行大乘大涅槃經觀怨憎會苦？善男子，是菩薩摩訶薩觀於地獄、畜生、餓鬼、人中、天上皆有如是怨憎會苦。譬如人觀牢獄、繫閉、枷鎖、杻械以為大苦；菩薩摩訶薩亦復如是，觀於五道一切受生，悉是怨憎合會大苦。復次，善男子，譬如有人，常畏怨家、枷鎖、杻械，捨離父母、妻子、眷屬、珍寶、產業而遠逃避。善男子，菩薩摩訶薩亦復如是，畏怖¹³⁹生死，具足修行六波羅蜜，入於涅槃。迦葉，是名菩薩修行大乘大般涅槃觀怨憎會苦。

「善男子，云何菩薩修行大乘大般涅槃觀求不得苦？求者，一切盡求。盡求者，有二種：一，求善法；二，求不善法。善法未得苦，惡法未離苦，是為¹⁴⁰略說五盛陰苦。

「迦葉，是名苦諦。」

爾時，迦葉菩薩摩訶薩白佛言：「世尊！如佛所說五盛陰苦，是義不然。何以故？如佛往昔告釋摩男：『若色苦者，一切眾生不應求色；若有求者則不名苦。』如佛告諸比丘：『有三種受：苦受、樂受、不苦不樂受。』如佛先為諸比丘說：

¹³⁹ 大正藏：怖畏

¹⁴⁰ 大正藏：則

『若有人，能修行善法，則得受樂。』又如佛說：『於善道中，六觸受樂，眼見好色，是則為樂；耳、鼻、舌、身、意思好法，亦復如是。』如佛說偈：

持戒則為樂	身不受眾苦
睡眠得安隱	寤則心歡喜
若受衣食時	誦習而經行
獨處於山林	如是為最樂
若能於眾生	晝夜常修慈
因是得常樂	以不惱他故
少欲知足樂	多聞分別樂
無著阿羅漢	亦名為受樂
菩薩摩訶薩	畢竟到彼岸
所作眾事辦	是名為最樂

「世尊！如諸經中所說樂相，其義如是。如佛今說，云何當與此義相應？」

佛告迦葉：「善哉！善哉！善男子，善能咨問如來是義。善男子，一切眾生，於下苦中橫生樂想，是故，我今所說苦相與本不異。」

迦葉菩薩白佛言：「如佛所說於下苦中生樂想者，下生、下老、下病、下死、下愛別離、下求不得、下怨憎會、下五盛陰，如是等苦亦應有

樂。世尊！下生者，所謂三惡趣；中生者，所謂人中；上生者，所謂天上。若復有人作如是問：『若於下樂生於苦想，於中樂中生無苦樂想，於上樂中生於樂想。』當云何答？世尊！若下苦中生樂想者，未見有人當受千罰，初一下時，已生樂想。若不生者，云何說言：『於下苦中而生樂想。』』

佛告迦葉：「如是如是，如汝所說，以是義故，無有樂想。何以故？猶如彼人當受千罰，受一下已，即得脫者，是人爾時便生樂想。是故當知，於無樂中，妄生樂想。」

迦葉言：「世尊！彼人不以一下生於樂想，以得脫故而生樂想。」

「迦葉，是故，我昔為釋摩男說五陰中樂，實不虛也。迦葉，有三受三苦。三受者，所謂樂受、苦受、不苦不樂受。三苦者，所謂苦苦、行苦、壞苦。善男子，苦受者，名為三苦，所謂苦苦、行苦、壞苦；餘二受者，所謂行苦、壞苦。善男子，以是因緣，生死之中，實有樂受。菩薩摩訶薩以苦樂性不相捨離，是故說言：『一切皆苦。』善男子，生死之中，實無有樂，但諸佛菩薩隨順世間說言有樂。」

迦葉菩薩白佛言：「世尊！諸佛菩薩若隨俗說，是虛妄不¹⁴¹？如佛所說：『修行善者，則受樂報，持戒安樂，身不受苦，乃至眾事已辦，是為最樂。』如是等經所說樂受，是虛妄不？若是虛妄，諸佛世尊，久於無量百千萬億阿僧祇劫，修菩提道，已離妄語，今作是說，其義云何？」

佛言：「善男子，如上所說諸受樂偈，即是菩提道之根本，亦能長養阿耨多羅三藐三菩提。以是義故，先於經中說是樂相。善男子，譬如世間所須資生，能為樂因，故名為樂，所謂女色、耽湎飲酒、上饌甘味、渴時得水、寒時遇火、衣服、瓔珞、象馬車乘、奴婢、僮僕、金、銀、瑠璃、珊瑚、真珠、倉庫穀米，如是等物世間所須，能為樂因，是名為樂。善男子，如是等物亦能生苦。因於女人生男子苦，憂愁悲泣乃至斷命。因酒甘味乃至倉庫¹⁴²，亦能令人生大憂惱，以是義故，一切皆苦，無有樂相。

「善男子，菩薩摩訶薩於是八苦，解苦無苦。

「善男子，一切聲聞、辟支佛等，不知樂因，為如是人，於下苦中，說有樂相。唯有菩薩住於

¹⁴¹ 大正藏：否

¹⁴² 大正藏：穀

大乘大般涅槃，乃能知是苦因樂因。

大般涅槃經卷第十一

大般涅槃經卷第十二

北涼天竺三藏曇無讖譯 梵

宋沙門慧嚴慧觀同謝靈運再治

聖行品第十九之二¹⁴³

「善男子，云何菩薩摩訶薩住於大乘大般涅槃觀察集諦？善男子，菩薩摩訶薩觀此集諦是陰因緣。所謂集者，還愛於有。愛有二種：一，愛己身；二，愛所須。復有二種：未得五欲，繫心專求；既求得已，堪忍專著。復有三種：欲愛、色愛、無色愛。復有三種：業因緣愛、煩惱因緣愛、苦因緣愛。出家之人有四種愛。何等為四？衣服、飲食、卧具、湯藥。復有五種：貪著五陰。隨諸所須一切愛著、分別校¹⁴⁴計無量無邊。

「善男子，愛有二種：一者，善愛；二，不善愛。不善愛者，凡愚之求；善法愛者，諸菩薩求。善法愛者復有二種：不善與善。求二乘者，名為不善；求大乘者，是名為善。善男子，凡夫愛者，名之為集，不名為諦；菩薩愛者，名之實

¹⁴³ 大正藏：之二

¹⁴⁴ 大正藏：校

諦，不名為集。何以故？為度眾生所以受生，不以愛故而受生也。」

迦葉菩薩白佛言：「世尊！如佛世尊於餘經中，為諸眾生說業為因緣，或說憍慢、或說六觸、或說無明為五盛陰而作因緣。今以何義，說四聖諦，獨以愛性為五陰因？」

佛讚迦葉：「善哉！善哉！善男子，如汝所說。諸因緣者，非為非因，但是五陰要因於愛。善男子，譬如大王，若出遊巡，大臣、眷屬悉皆隨從；愛亦如是，隨愛行處，是諸結等亦復隨行。譬如膩衣，隨有塵著，著則隨住；愛亦如是，隨所愛處，業結亦住。復次，善男子，譬如濕地，則能生牙；愛亦如是，能生一切業煩惱牙。

「善男子，菩薩摩訶薩住是大乘大般涅槃，深觀此愛，凡有九種：一，如責¹⁴⁵有餘；二，如羅刹女婦；三，如妙華莖有毒蛇；四，如惡食性所不便而強食之；五，如婬女；六，如摩樓迦子；七，如瘡中癰肉；八，如暴風；九，如彗星。

「云何名為如責有餘？善男子，譬如窮人，負他錢財，雖償欲畢，餘未畢故，猶繫在獄而不得脫。聲聞、緣覺亦復如是，以有愛習之餘氣故，

¹⁴⁵ 大正藏：債（後同）

不能得成阿耨多羅三藐三菩提。善男子，是名如責有餘。

「善男子，云何如羅刹女婦？善男子，譬如有人，得羅刹女納以為婦，是羅刹女隨所生子，生已便食；食子既盡，復食其夫。善男子，愛羅刹女亦復如是，隨諸眾生生善根子，隨生隨食；善子既盡，復食眾生，令墮地獄、畜生、餓鬼，唯除菩薩。是名如羅刹女婦。

「善男子，云何如妙華莖毒蛇纏之？譬如有人，性愛好華，不見華莖毒蛇過患，即便前捉，捉已蛇螫，螫已命終。一切凡夫亦復如是，貪五欲華，不見是愛毒蛇過患而便受取，即為愛蛇之所毒螫，命終即墮三惡道中，唯除菩薩。是名如妙華莖毒蛇纏之。

「善男子，云何所不便食而強食之？譬如有人，所不便食，而強食之，食已腹痛，患下而死。愛食如是，五道眾生強食貪著，以是因緣，墮三惡道，唯除菩薩。是名所不便食而強食之。

「善男子，云何如婬女？譬如愚人與婬女通，而彼婬女，巧作種種諂媚現親，悉奪是人所有錢財，錢財既盡，便復驅逐。愛之婬女亦復如是，愚人無智與之交通，而是愛女奪其所有一切善法，

善法既盡，驅逐令墮三惡道中，唯除菩薩。是名如姪女¹⁴⁶。

「善男子，云何如摩樓迦子？譬如摩樓迦子，若鳥食已，隨糞墮地，或因風吹來，在樹下即便生長，纏繞縛束¹⁴⁷尼拘羅樹，令不增長，遂至枯死。愛摩樓迦子亦復如是，纏縛凡夫所有善法，不令增長，遂至枯滅，既枯滅已，命終之後，墮三惡道，唯除菩薩。是名如摩樓迦子。

「善男子，云何如瘡中癰肉？如人久瘡，中生癰肉，其人要當勤心療治，莫生捨心。若生捨心，癰肉增長，蟲疽復生，以是因緣，即便命終。凡夫愚人五陰瘡癩亦復如是，愛於其中而為癰肉，應當勤心治愛癰肉。若不治者，命終即墮三惡道中，唯除菩薩。是名如瘡中癰肉。

「善男子，云何如暴風？譬如暴風，能偃山夷岳，拔於深根。愛欲暴風亦復如是，於父母所而生惡心，能拔大智舍利弗等無上深固菩提根本，唯除菩薩。是名如暴風。

「善男子，云何如彗星？譬如彗星出現，天下一切人民饑饉病瘦，嬰諸苦惱。愛之彗星亦復

¹⁴⁶ 大正藏：是名姪女

¹⁴⁷ 大正藏：纏繞束縛

如是，能斷一切善根種子，令凡夫人孤窮饑饉，生煩惱病，流轉生死，受種種苦，唯除菩薩。是名如彗星。

「善男子，菩薩摩訶薩住於大乘大般涅槃，觀察愛結如是九種。善男子，以是義故，諸凡夫人有苦無諦；聲聞、緣覺有苦有苦諦而無真實；諸菩薩等解苦無苦，是故無苦而有真諦。諸凡夫人有集無諦；聲聞、緣覺有集有集諦；諸菩薩等解集無集，是故無集而有真諦。聲聞、緣覺有滅非真；菩薩摩訶薩有滅有真諦。聲聞、緣覺有道非真；菩薩摩訶薩，有道有真諦。

「善男子，云何菩薩摩訶薩住於大乘大般涅槃見滅、見滅諦？所謂斷除一切煩惱。若煩惱斷，則名為常；滅煩惱火，則名寂滅；煩惱滅故，則得受樂。諸佛菩薩求因緣故，故名為淨；更不復受二十五有，故名出世；以出世故，故名為我常；於色、聲、香、味、觸等，若男若女、若生住滅、若苦若樂、不苦不樂，不取相貌故名畢竟寂滅真諦。善男子，菩薩如是住於大乘大般涅槃觀滅聖諦。

「善男子，云何菩薩摩訶薩住於大乘大般涅槃觀道聖諦？善男子，譬如闇中，因燈得見麤細

之物。菩薩摩訶薩亦復如是，住於大乘大般涅槃，因八聖道見一切法，所謂常、無常，有為、無為，有眾生、非眾生，物、非物，苦、樂，我、無我，淨、不淨，煩惱、非煩惱，業、非業，實、不實，乘、非乘，知、無知，陀羅驃、非陀羅驃，求那、非求那，見、非見，色、非色，道、非道，解、非解。善男子，菩薩如是住於大乘大般涅槃觀道聖諦。」

迦葉菩薩白佛言：「世尊！若八聖道是道聖諦，義不相應。何以故？如來或說：『信心為道，能度諸漏。』或時說：『道，不放逸是。諸佛、世尊不放逸故，得阿耨多羅三藐三菩提；亦是菩薩助道之法。』或時說言：『精進是道。』如告阿難：『若有人能勤修精進，則得成就阿耨多羅三藐三菩提。』或時說言：『觀身念處，若有繫心精勤修習是身念處，則得成就阿耨多羅三藐三菩提。』或時說言：『正定為道。』如告大德摩訶迦葉：『夫正定者，真實是道；非不正定而是道也。若入禪¹⁴⁸定，乃能思惟五陰生滅，非不入¹⁴⁹定能思惟也。』或說一法：『若人修習，能淨眾生，滅除一切憂

¹⁴⁸ 大正藏：正

¹⁴⁹ 大正藏：人

愁苦惱，逮得正法，所謂念佛三昧。』或復說言：『修無常想，是名為道。』如告比丘：『有能多修無常想者，能得阿耨多羅三藐三菩提。』或說：『空寂阿蘭若處，獨坐思惟，能得速成阿耨多羅三藐三菩提。』或時說言：『為人演法，是名為道。若聞法已，疑網即斷，疑網斷已，則得阿耨多羅三藐三菩提。』或時說言：『持戒是道。』如告阿難：『若有精勤修持禁戒，是人則度生死大苦。』或時說言：『親近善友，是名為道。』如告阿難：『若有親近善知識者，則具¹⁵⁰淨戒。若有眾生能親近我，則得發於阿耨多羅三藐三菩提心。』或時說言：『修慈是道。修學慈者，斷諸煩惱，得不動處。』或時說言：『智慧是道。』如佛昔為波闍波提比丘尼說：『姊妹，如諸聲聞以智慧刀能斷諸流、諸漏煩惱。』或時如來說：『施是道。』如佛往昔告波斯匿王：『大王當知，我於往昔多行惠施，以是因緣，今日得成阿耨多羅三藐三菩提。』世尊！若八聖道是道諦者，如是等經豈非虛妄？若彼諸經非虛妄者，彼中何緣不說八道為道聖諦？若彼不說，如來往昔何故錯謬？然我定知諸佛如來久離錯謬。」

¹⁵⁰ 大正藏：安

爾時，世尊讚迦葉菩薩：「善哉！善哉！善男子，汝今欲知菩薩大乘微妙經典所有祕密，故作是問。善男子，如是諸經悉入道諦。

「善男子，如我先說，若有信道，如是信道是信根本，是能佐助菩提之道。是故，我說無有錯謬。

「善男子，如來善知無量方便，欲化眾生故，作如是種種說法。善男子，譬如良醫，識諸眾生種種病源，隨其所患而為合藥。并藥所禁，唯水一種不在禁例，或服薑水、或甘草水、或細辛水、或黑石蜜水、或阿摩勒水、或尼婆羅水、或鉢耨羅水、或服冷水、或服熱水、或蒲萄水、或安石榴水。善男子，如是，良醫善知眾生所患種種，藥雖多禁，水不在例。如來亦爾，善知方便於一法相，隨諸眾生分別廣說種種名相。彼諸眾生，隨所說受，受已修習，除斷煩惱，如彼病人，隨良醫教，所患得除。

「復次，善男子，如有一人，善解眾語，在大眾中。是諸大眾，熱渴所逼，咸發聲言：『我欲飲水！我欲飲水！』是人即時以清冷水隨其種類說言是水，或言波尼、或言鬱持¹⁵¹、或言鬘利

¹⁵¹ 大正藏：特

藍、或言婆利、或言波¹⁵²耶、或言甘露、或言牛乳，以如是等無量水名為大眾說。善男子，如來亦爾，以一聖道為諸聲聞種種演說，從信根等至八聖道。

「復次，善男子，譬如金師，以一種金隨意造作種種瓔珞，所謂鉗鎖、環釧、釵璫¹⁵³、天冠、臂印，雖有如是差別不同，然不離金。善男子，如來亦爾，以一佛道隨諸眾生種種分別而為說之，或說一種，所謂諸佛一道無二。復說二種，所謂定、慧。復說三種，謂見、慧、智。復說四種，所謂見道、修道、無學道、佛道。復說五種，所謂信行道、法行道、信解脫道、見到道、身證道。復說六種，所謂須陀洹道、斯陀含道、阿那含道、阿羅漢道、辟支佛道、佛道。復說七種，所謂念覺分、擇法覺分、精進覺分、喜覺分、除覺分、定覺分、捨覺分。復說八種，所謂正見、正思惟、正語、正業、正命、正精進、正念、正定。復說九種，所謂八道及信¹⁵⁴。復說十種，所謂十力。復說十一種，所謂十力、大慈。復說十二種，所謂十力、大慈、大悲。復說十三種，所謂十力、

¹⁵² 大正藏：婆

¹⁵³ 大正藏：鐺

¹⁵⁴ 大正藏：所謂八聖道及信

大慈、大悲、念佛三昧。復說十六種，所謂十力、大慈、大悲、念佛三昧，及佛所得三正念處。復說二十道，所謂十力、四無所畏、大慈、大悲、念佛三昧、三正念處。善男子，是道一體，如來昔日為眾生故，種種分別。

「復次，善男子，譬如一火，因所燃故得種種名，所謂木火、草火、糠火、麩火、牛馬糞火。善男子，佛道亦爾，一而無二，為眾生故，種種分別。

「復次，善男子，譬如一識，分別說六，若至於眼，則名眼識，乃至意識，亦復如是。善男子，道亦如是，一而無二，如來為化諸眾生故，種種分別。

「復次，善男子，譬如一色，眼所見者則名為色，耳所聞者則名為聲，鼻所嗅者則名為香，舌所嘗者則名為味，身所覺者則名為觸。善男子，道亦如是，一而無二，如來為欲化眾生故，種種分別。善男子，以是義故，以八聖道分名道聖諦。

「善男子，是四聖諦，諸佛世尊次第說之，以是因緣，無量眾生得度生死。」

迦葉白佛言¹⁵⁵：「世尊！昔佛一時，在恒河

¹⁵⁵ 大正藏：迦葉菩薩白佛言

岸尸首林中。爾時，如來取少¹⁵⁶樹葉告諸比丘：

『我今手中所捉葉多，一切因地草木葉多？』諸比丘言：『世尊！一切因地草木葉多，不可稱計；如來所捉，少不足言。』『諸比丘，我所覺了一切諸法，如因大地生草木等；為諸眾生所宣說者，如手中葉。』世尊爾時說如是言：『如來所了無量諸法。若入四諦則為已說；若不入者，應有五諦。』』

佛讚迦葉：「善哉！善哉！善男子，汝今所問則能利益、安隱、快樂無量眾生。善男子，如是諸法，悉已攝在四聖諦中。」

迦葉菩薩復白佛言：「如是等法若在四諦，如來何故唱言不說？」

佛言：「善男子，雖復入中，猶不名說。何以故？善男子，知聖諦有二種智：一者，中；二者，上。中者，聲聞緣覺¹⁵⁷；上者，諸佛菩薩¹⁵⁸。善男子，知諸陰苦，名為中智；分別諸陰有無量相，悉是諸苦，非是¹⁵⁹聲聞、緣覺所知，是名上智。善男子，如是等義，我於彼經竟不說之。」

「善男子，知諸入者，名之為門，亦名為苦，是名中智；分別諸入有無量相，悉是諸苦，非諸

¹⁵⁶ 大正藏：小

¹⁵⁷ 大正藏：聲聞緣覺智

¹⁵⁸ 大正藏：諸佛菩薩智

¹⁵⁹ 大正藏：諸

聲聞、緣覺所知，是名上智。如是等義，我於彼經亦不說之。

「善男子，知諸界者，名之為分，亦名為性，亦名為苦，是名中智；分別諸界有無量相，悉是諸苦，非諸聲聞、緣覺所知，是名上智。善男子，如是等義，我於彼經亦不說之。

「善男子，知色壞相，是名中智；分別諸色有無量壞相¹⁶⁰，悉是諸苦，非諸聲聞、緣覺所知，是名上智。如是等義，我於彼經亦不說之。

「善男子，知受覺相，是名中智；分別諸受有無量覺相，非諸聲聞、緣覺所知，是名上智。善男子，如是等義，我於彼經亦不說之。

「善男子，知想取相，是名中智；分別是想有無量取相，非諸聲聞、緣覺所知，是名上智。如是等義，我於彼經亦不說之。

「善男子，知行作相，是名中智；分別是行無量作相，非諸聲聞、緣覺所知，是名上智。善男子，如是等義，我於彼經亦不說之。

「善男子，知識分別相，是名中智；分別是識無量知相，非諸聲聞、緣覺所知，是名上智。善男子，如是等義，我於彼經亦不說之。

¹⁶⁰ 大正藏：分別諸色有無量相

「善男子，知愛因緣能生五陰，是名中智；一人起愛無量無邊，聲聞、緣覺所不能知，能知一切眾生所起如是等愛，是名上智。如是等義，我於彼經亦不說之。」

「善男子，知滅煩惱，是名中智；分別煩惱不可稱計，滅亦如是不可稱計，非諸聲聞、緣覺所知，是名上智。如是等義，我於彼經亦不說之。」

「善男子，知是道相能離煩惱，是名中智；分別道相無量無邊，所離煩惱亦無量無邊，非諸聲聞、緣覺所知，是名上智。如是等義，我於彼經亦不說之。」

「善男子，知世諦者，是名中智；分別世諦無量無邊不可稱計，非諸聲聞、緣覺所知。是名上智。如是等義，我於彼經亦不說之。」

「善男子，知一切行無常¹⁶¹、諸法無我、涅槃寂滅是第一義，是名中智；知第一義無量無邊不可稱計，非諸聲聞、緣覺所知，是名上智。如是等義，我於彼經亦不說之。」

爾時，文殊師利菩薩白佛言：「世尊！所說世諦、第一義諦，其義云何？世尊！第一義中有世諦不？世諦之中有第一義不？如其有者，即是

¹⁶¹ 大正藏：善男子，一切行無常

一諦；如其無者，將非如來虛妄說耶？」

「善男子，世諦者，即第一義諦。」

「世尊！若爾者，則無二諦。」

佛言：「善男子，有善方便，隨順眾生說有二諦。善男子，若隨言說，則有二種：一者，世法；二者，出世法。善男子，如出世人之所知者，名第一義諦；世人知者，名為世諦。」

「善男子，五陰和合稱言某甲，凡夫眾生隨其所稱，是名世諦；解陰無有某甲名字，離陰亦無某甲名字，出世之人如其性相而能知之，名第一義諦。」

「復次，善男子，或有法¹⁶²，有名有實；或復有法，有名無實。善男子，有名無實者，即是世諦；有名有實者，是第一義諦。善男子，如我、眾生、壽命、知見、養育、丈夫、作者、受者，熱時之燄¹⁶³、乾闥婆城、龜毛、兔角、旋火之輪，諸陰、界、入，是名世諦；苦、集、滅、道，名第一義諦。」

「善男子，世法有五種：一者，名世；二者，句世；三者，縛世；四者，法世；五者，執著世。」

¹⁶² 大正藏：或復有法

¹⁶³ 大正藏：炎

善男子，云何名世？男、女、瓶、衣、車乘、屋舍，如是等物是名名世。云何句世？四句一偈，如是等偈是名句世。云何縛世？捲合繫結，束縛合掌，是名縛世。云何法世？如鳴椎集僧，嚴鼓戒¹⁶⁴兵，吹貝知時，是名法世。云何執著世？如望遠人有染衣者，生想執著，言：『是沙門，非婆羅門。』見有結繩橫佩身上，便生念言：『是婆羅門，非沙門也。』是名執著世。

「善男子，如是名為五種世法。善男子，若有眾生，於如是等五種世法心無顛倒，如實而知，是名第一義諦。

「復次，善男子，若燒、若割、若死、若壞，是名世諦；無燒、無割、無死、無壞，是名第一義諦。

「復次，善男子，有八苦相名為世諦；無生、無老、無病、無死、無愛別離、無怨憎會、無求不得、無五盛陰，是名第一義諦。

「復次，善男子，譬如一人，多有所能，若其走時，則名走者；若¹⁶⁵收刈時，復名刈者；若¹⁶⁶作飲食，名作食者；若治材木，則名工匠；鍛

¹⁶⁴ 大正藏：誠

¹⁶⁵ 大正藏：或

¹⁶⁶ 大正藏：或

金銀時，言金銀師。如是一人，有多名字。法亦如是，其實是一而有多名。依因父母和合而生，名為世諦；十二因緣和合生者，名第一義諦。」

文殊師利菩薩白佛言：「世尊！所言實諦，其義云何？」

佛言：「善男子，言實諦者，名曰真法。善男子，若法非真，不名實諦。善男子，實諦者無顛倒，無顛倒者乃名實諦。善男子，實諦者，無有虛妄；若有虛妄不名實諦。善男子，實諦者，名曰大乘；非大乘者，不名實諦。善男子，實諦者，是佛所說，非魔所說；若是魔說、非佛說者，不名實諦。善男子，實諦者，一道清淨，無有二也。善男子，有常、有樂、有我、有淨，是則名為實諦之義。」

文殊師利白佛言：「世尊！若以真實為實諦者，真實之法即是如來、虛空、佛性。若如是者，如來、虛空及與佛性無有差別。」

佛告文殊師利：「有苦有諦有實，有集有諦有實，有滅有諦有實，有道有諦有實。善男子，如來非苦非諦是實，虛空非苦非諦是實，佛性非苦非諦是實。」

「文殊師利，所言苦者，為無常相，是可斷

相，是為實諦。如來之性，非苦、非無常、非可斷相，是故為實；虛空、佛性亦復如是。

「復次，善男子，所言集者，能令五陰和合而生，亦名為苦、亦名為¹⁶⁷常，是可斷相，是為實諦。善男子，如來非是集性，非是陰因，非可斷相，是故為實；虛空、佛性亦復如是。

「善男子，所言滅者，名煩惱滅，亦常、無常。二乘所得，名曰無常；諸佛所得，是則名常，亦名證法，是為實諦。善男子，如來之性不名為滅，能滅煩惱，非常、無常，不名證法¹⁶⁸，常住無變，是故為實；虛空、佛性亦復如是。

「善男子，道者能斷煩惱，亦常、無常，是可修法，是為¹⁶⁹實諦。如來非道，能斷煩惱，非常、無常，非可修法，常住不變，是故為實；虛空、佛性亦復如是。

「復次，善男子，言真實者，即是如來；如來者，即是真實。真實者，即是虛空；虛空者，即是真實。真實者，即是佛性；佛性者，即是真實。

「文殊師利，有苦、有苦因、有苦盡、有苦

¹⁶⁷ 大正藏：無；永樂北藏及龍藏：為

¹⁶⁸ 大正藏：知

¹⁶⁹ 大正藏：名

對。如來非苦乃至非對，是故為實，不名為諦；虛空、佛性亦復如是。苦者，有為、有漏、無樂。如來非有為、非有漏，湛然安樂，是實非諦。」

文殊師利白佛言：「世尊！如佛所說：『不顛倒者，名為實諦。』若爾者，四諦之中有四倒不？如其有者，云何說言無有顛倒名為實諦，一切顛倒不名為實？」

佛告文殊師利：「一切顛倒皆入苦諦。如諸眾生有顛倒心，名為顛倒。善男子，譬如有人，不受父母尊長教勅，雖受不能隨順修行，如是人等，名為顛倒。如是顛倒非不是苦，即是苦也。」

文殊師利言：「如佛所說：『不虛妄者，即是實諦。』若爾者，當知虛妄，則非實諦。」

佛言：「善男子，一切虛妄皆入苦諦。如有眾生，欺誑於他，以是因緣，墮於地獄、畜生、餓鬼，如是等法，名為虛妄。如是虛妄非不是苦，即是苦也。聲聞、緣覺、諸佛世尊遠離不行，故名虛妄。如是虛妄，諸佛、二乘所斷除故，故名實諦。」

文殊師利言：「如佛所說大乘是實諦者，當知聲聞、辟支佛乘則為不實。」

佛言：「文殊師利，彼二乘者，亦實、不實。」

聲聞、緣覺斷諸煩惱，則名為實；無常不住是變易法，名為不實。」

文殊師利言：「如佛所說：『若佛所說名為實者，當知魔說則為不實。』世尊！如魔所說，聖諦攝不？」

佛言：「文殊師利，魔所說者，二諦所攝，所謂苦、集。凡是一切非法、非律，不能令人而得利益，終日宣說亦無有人見苦、斷集、證滅、修道，是名虛妄。如是虛妄名為魔說。」

文殊師利言：「如佛所說一道清淨，無有二者，諸外道等亦復說言：『我有一道，清淨無二。』若言一道是實諦者，與彼外道有何差別？若無差別，不應說言一道清淨。」

佛言：「善男子，諸外道等有苦、集諦，無滅、道諦，於非滅中而生滅想，於非道中而生道想，於非果中而生果想，於非因中而生因想。以是義故，彼無一道清淨無二。」

文殊師利言：「如佛所說『有常、有我、有樂、有淨是實義』者，諸外道等應有實諦，佛法中無。何以故？諸外道輩亦復說言：『諸行是常。』云何是常？可意、不可意、諸業報等受不失故。可意者，名十善報；不可意者，十不善報。若言

諸行皆悉¹⁷⁰無常，而作業者於此已滅，誰復於彼受果報乎？以是義故，諸行是常。殺生因緣，故名為常。世尊！若言諸行悉無常者，能殺、可殺二俱無常。若無常者，誰於地獄而受罪報？若言定有地獄受報¹⁷¹，當知諸行實非無常。世尊！繫心專念，亦名為常，所謂十年所念，乃至百年亦不忘失，是故為常。若無常者，本所見事誰憶？誰念？以是因緣，一切諸行非無常也。世尊！一切憶想亦名為常。有人先見他人手、足、頭、項等相，後時若見，便還識之。若無常者，本相應滅。世尊！諸所作業以久修習，若從初學、或經三年、或經五年，然後善知，故名為常。世尊！算數之法從一至二、從二至三，乃至百千。若無常者，初一應滅。初一若滅，誰復至二？如是常一，終無有二。以一不滅故得至二，乃至百千，是故為常。世尊！如讀誦法，誦一阿含至二阿含，乃至三、四阿含。如其無常，所可讀誦終不至四。以是讀誦增長因緣，故名為常。世尊！瓶、衣、車乘，如人負責¹⁷²，大地形相，山河樹林，藥木草葉，眾生治病，皆悉是常，亦復如是。世尊！

¹⁷⁰ 大正藏：悉皆

¹⁷¹ 大正藏：若言定有地獄受報者

¹⁷² 大正藏：債

一切外道皆作是說：『諸行是常。』若是常者，即是實諦。

「世尊！有諸外道復言有樂。云何知耶？受者定得可意報故。世尊！凡受樂者必定得之，所謂大梵天王、大自在天、釋提桓因、毗紐天及諸人天。以是義故，必¹⁷³定有樂。世尊！有諸外道復言有樂，能令眾生求望故，飢者求食，渴者求飲，寒者求溫，熱者求涼，極者求息，病者求差，欲者求色。若無樂者，彼何緣求？以有求故¹⁷⁴，故知有樂。世尊！有諸外道復作是言：『施能得樂。』世間之人好施沙門、諸婆羅門、貧窮困苦，衣服、飲食、卧具、醫藥、象馬車乘、¹⁷⁵香、塗香、眾華、屋宅、依止燈明，作如是等種種惠施，為我後世受可意報，是故當知決定有樂。世尊！有諸外道復作是言：『以因緣故，當知有樂。』所謂受樂者，有因緣故，名為樂觸。若無樂者，何得因緣？如無兔角，則無因緣；有樂因緣，則知有樂。世尊！有諸外道復作是言：『上中下故，當知有樂。』下受樂者，釋提桓因；中受樂者，大梵天王；上受樂者，大自在天。以

¹⁷³ 大正藏：名

¹⁷⁴ 大正藏：者

¹⁷⁵ 大正藏：末

有如是上中下故，當知有樂。

「世尊！有諸外道復言有淨。何以故？若無淨者，不應起欲；若起欲者，當知有淨。又復說言：『金、銀、珍寶、瑠璃、玻瓈、碑磔、碼碯、珊瑚、真珠、璧玉、珂貝、流泉、浴池、飲食、衣服、華香、糝¹⁷⁶香、塗香、燈燭之明，如是等物悉是淨法。』復次，有淨，謂五陰者即是淨器，盛諸淨物，所謂人、天、諸仙、阿羅漢、辟支佛、菩薩、諸佛。以是義故，名之為淨。

「世尊！有諸外道復言有我，有所覩見，能造作故。譬如有人，入陶師家，雖復不見陶師之身，以見輪繩，定知其家必是陶師。我亦如是，眼見色已，必知有我。若無我者，誰能見色？聞聲乃至觸法，亦復如是。復次，有我。云何得知？因相故知。何等為相？喘息、視眴、壽命、役心、受諸苦樂、貪求、瞋恚，如是等法悉是我相，是故當知必定有我。復次，有我，能別味故。有人食果，見已知味，是故當知必定有我。復次，有我。云何知耶？執作業故。執鑷能刈，執斧能斫，執瓶盛水，執車能御，如是等事我執能作，是故當知必定有我。復次，有我。云何知耶？即於生

¹⁷⁶ 大正藏：末

時，欲得乳哺，乘宿習故，以是¹⁷⁷當知必定有我。復次，有我云何知耶？和合利益他眾生故。譬如瓶、衣、車乘、田宅、山林、樹木、象、馬、牛、羊如是等物，若和合者，則有利益。此內五陰亦復如是，眼等諸根有和合故，則利益我，是故當知必定有我。復次，有我。云何知耶？有遮法故。如有物故，則有遮闔¹⁷⁸；物若無者，則無有遮。若有遮者，則知有我，是故當知必定有我。復次，有我。云何知耶？伴非伴故。親與非親非是伴侶，正法、邪法亦非伴侶，智與非智亦非伴侶，沙門非沙門、婆羅門非婆羅門、子非子、晝非晝、夜非夜、我非我，如是等法為伴非伴，是故當知必定有我。

「世尊！諸外道等種種說有常、樂、我、淨，當知定有常、樂、我、淨。世尊！以是義故，諸外道等亦得說言：『我有真諦。』」

佛言：「善男子，若有沙門、婆羅門，有常、有樂、有我、有淨¹⁷⁹者，是非沙門、非婆羅門。何以故？迷於生死，離一切智大導師故。如是沙門、婆羅門等，沈沒諸欲，善法羸損故。是諸外

¹⁷⁷ 大正藏：是故

¹⁷⁸ 大正藏：礙

¹⁷⁹ 大正藏：有常、有樂、有淨、有我

道繫在貪欲、瞋恚、癡獄，堪忍愛樂故。是諸外道雖知業果自作自受，而猶不能遠離惡法。是諸外道非是正法正命自活。何以故？無智慧火，不能消故。是諸外道雖欲貪著上妙五欲，貧於善法不勤修故。是諸外道雖欲往至正解脫中，而持戒足不成就故。是諸外道雖欲求樂，而不能求樂因緣故。是諸外道雖復憎惡一切諸苦，然其所行未能遠離諸苦因緣。是諸外道雖為四大毒蛇所纏，猶行放逸，不能謹慎。是諸外道無明所覆，遠離善友，樂在三界無常熾然大火之中而不能出。是諸外道遇諸煩惱難愈之病，而復不求大智良醫。是諸外道方於未來當涉無邊險遠之路，而不知以善法資糧而自莊嚴。是諸外道常為婬欲災毒所害，而反抱持五欲霜毒。是諸外道瞋恚熾盛，而復反更親近惡友。是諸外道常為無明之所覆蔽，而反推求邪惡之法。是諸外道常為邪見之所誑惑，而反於中生親善想。是諸外道希食甘果，而種苦子。是諸外道已處煩惱闇室之中，而反遠離大智炬明。是諸外道患煩惱渴，而復又¹⁸⁰飲諸欲鹹水。是諸外道漂沒生死無邊大河，而復遠離無上船師。是

¹⁸⁰ 大正藏：反

諸外道迷惑諸¹⁸¹倒言諸行常。諸行若常，無有是處。

大般涅槃經卷第十二

¹⁸¹ 大正藏：顛

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無大般涅槃經 (合掌三稱)

發願文

(一編)

志心懺悔。我(某甲)與一切衆生，從無始來，
迷失真心，流轉生死，六根罪障，無量無邊，圓
妙佛乘，無以開解，一切所願，不得現前。我今
讀誦大般涅槃經，以此善根，發露黑惡，過、現、
未來三業所造無邊重罪，皆得消滅，身心清淨，

惑障蠲除，福智莊嚴，淨因增長，自他行願速得圓成。願諸如來常在說法，所有功德起隨喜心，迴向菩提，證常樂果。命終之日，正念現前，面見彌陀及諸聖眾，一剎那頃，生蓮華中。普願眾生，俱成佛道。

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

